

唐詩紀事



唐詩紀事卷第六十

李節 費冠卿 劉虛白 蕭建 袁不約

孫緯 周祚 崔澹 盧頻 李廓

李頻 賈馳 薛能 曹鄴 裴虔餘

陳陶

李節

會昌季年武宗大翦釋氏巾其徒且數萬人民隸其居容貌于土木者沈諸水言詞于紙素者烈諸火分命御史乘驛走天下察敢隱匿者罪之由是天下名祠珍宇毀撤如掃天子建極之初雪釋氏之不可廢也詔徐復之而自湖已南遠人畏法不能酌朝廷之體前時焚撤書像殆無遺者故雖明命復許創立莫能得其書道林寺湘川之勝遊也有釋疏言警辦有謀獨曰太原府國家舊都多釋祠我聞其帥司空范陽公天下仁人我第往求釋氏遺文以惠湘川之人宜其聽我而助成之矣即杖而北遊既上

謁軍門范陽公果諾之因四求散逸不成蘊帙者至釋祠而不見焚而副
贖者又命講丐以補繕缺漏者未幾得釋經四千五十八卷以大中九年
秋八月輦自河東而歸於湘焉喜釋氏之助世既言之矣向非我君洞鑒
理源其何能復立之卽旣立之且亡其書非有疏言識遠而誠堅孰克洪
之耶吾喜疏言奉君之令演釋之宗不憚寒暑之勤德及遠人爲敘其事
且贈以詩湘川狺狺兮俗獷且佷利殺業偷兮吏莫之馴繫釋氏兮易暴
使仁釋何在兮釋在斯文湘水滔滔兮四望何依猿狖騰拏兮雲樹飛飛
月沈浦兮煙暝山檣席卷兮櫓牀閒偃仰兮嘯詠鼓長江兮何時還湘川
超忽兮落日晼晼松覆秋亭兮蘭被春苑上人去兮幾千里何日同遊兮
湘川水

節登大中進士第

費冠卿

閒居卽事云生計唯將三尺僮學他賢者隱墻東照眠夜後多因月掃地

春來祇藉風幾處紅旗驅戰士一園青草伴衰翁子房仙去孔明死更有何人解指蹤

酬范中丞見惠云花宮柳陌正從行紫袂金鞍問姓名戰國方須禮干木
康時何必重侯嬴捧將束帛山僮喜傳示銀鈎邑客驚直爲雲泥相去遠
一言知己殺身輕

秋日與冷然上人寺莊觀稼云世人從擾擾獨自愛身閒美景當新霽隨
僧過遠山村橋出秋稼空翠落澄灣唯有中林犬猶應望我還

題中峯云中峯高柱沈寥天上有茅菴與石泉晴景獵人曾望見青藍色
裏一僧禪

蒙召拜拾遺書情二首云拾遺帝側知難得官緊才微恐不勝好是中朝
絕親友九華山下詔來徵又云三千里外一微臣二十年來任運身今日
忽蒙天子召自慙驚動國中人

桂樹云本爲獨立難寄彼高樹枝蔓衍數條遠溟濛千朵垂向日助成陰

當風藉持危誰言柔可屈坐見蟠蛟螭

枕流石云不爲幽岸隱古色涵空出願以清泚流鑒此堅貞質傍臨玉光
潤時瀉苔花密往往驚遊鱗尙疑垂釣日

冠卿字子庫池州人久居京師感懷詩云癯獨不爲苦求名始辛酸上國
無交親請謁多少難九月風到面羞汗成冰片求名俟公道名與公道遠
力盡一得名他喜我且輕家書十年絕歸去知誰榮馬嘶渭橋柳特地起
秋聲登元和二年第母卒既葬而歸歎曰干祿養親耳得祿而親喪何以
祿爲遂隱池州九華山長慶中殿院李行修舉其孝節拜右拾遺制曰前
進士費冠卿當預計偕以文中第祿不及于榮親恨每積于永懷遂乃屏
身邱園絕跡仕進守其至性十有五年峻節無悶清飈自遠夫旌孝行舉
逸人所以厚風俗而敦名教也宜承高獎以儆薄夫擢參近侍之榮載佇
移忠之効冠卿竟不應命杜荀鶴有詩弔其墓曰凡弔先生者多傷荆棘
閒不知三尺墓高卻九華山天地有何外子孫無亦閒當時若徵起未必

得身還冠卿以拾遺召不起賦詩云君親同是先王道何如骨肉一處老也知臣下合佐時自古榮華誰可保

姚合嘗寄詩云逍遙矰繳外高鳥與潛魚闕下無朝籍林閒有詔書夜眠幽洞石曉飯白雲蔬四海人空老九華君獨居此心誰復識日與世相疎李羣玉經費拾遺故居云雲臥竟不起少微空隕光惟應孔北海爲立鄭公鄉舊館苔蘚合幽齋松菊荒空餘書帶草日日上階長

劉虛白

竟陵人劉虛白擢進士第嗜酒有詩云知道醉鄉無戶稅任他荒卻下丹田出北夢瑣言虛白與盧坦交友坦主文虛白於簾前獻一絕云二十年前此夜中一般燈燭一般風不知歲月能多少猶著麻衣待至公

蕭建

蕭與費冠卿同時建寄冠卿云見說九華峯上寺日宮猶在下方開其中幽境客難到請爲詩中圖畫來冠卿答詩云自地上青峯懸崖一萬重踐

危頻側足登塹半齊胸飛狷啼攀桂遊人喘倚松入林寒瘁近瀑雨濛濛
徑滑石稜上寺開山掌中幡花撲淨地臺殿印晴空勝境層層別高僧
院院逢泉魚候洗鉢老獼戲撞鐘外戶憑雲掩中厨課水春搜泥時和麪
拾橡半添種渡壑緣槎險持燈入洞窮夾天開壁峭透石蹙波雄澗靄清
無土潭深壁有龍畬田一片淨谷樹萬株濃野客登臨慣山房幽寂同寒
爐樹根火夏牖竹稍風邊鄙籌賢相黔黎託聖躬君能棄名利歲晏一相
從

建登進士第終禮部侍郎

袁不約

不約有深秋之句云愁聲秋遶杵寒色碧歸山又有客去之句云送將歡
笑去收得寂寥迴張爲取二聯于主客圖

范攄云李固言在成都則李珪郎中郭圓員外陳會端公袁不約侍郎來
擇書記薛重評事皆遠從公可謂蓮幕之盛

不約登長慶三年第

孫緯

中秋夜思鄭延美有作云中中秋中夜月世說惛妖精顧兔雲初蔽長蛇誰
與勅未追良友翫安用玉輪盈此意人誰諭裁詩寄禁城
緯咸通八年宏詞登科

周祚

莫道春花獨照人秋花未必怯青春四時風雨沒時節共保松筠根底塵
祚以此詩得名張爲取作主客圖

崔澹

贈美人云怪得輕風送異香娉婷仙子曳霓裳惟憂錯認偷桃客曼倩曾
爲漢侍郎

大中末崔鉉自平章事鎮淮海梅收爲支使收狀云前時里巷初迎避馬
之威今日藩垣便仰問牛之代澹之詞也澹終吏部侍郎

盧頻

蛟蝶行云東園宮草綠上下飛相逐君恩不禁春昨夜花中宿

東西行云種荷玉盆裏不及溝中水養雉黃金籠見草心先喜

頻又有春淚爛綺羅泣聲抽恨多莫滴芙蓉地愁傷連蒂荷句一一朵花葉

飛一枝無光彩美人惜花心但願春長在句右張爲取作主客圖

李廓

夏日途中云樹夾炎風路行人正午稀初蟬數聲起戲蝶一團飛日色欺
清鏡槐膏點白衣無成歸故里自覺少光輝

廓李程之子也登元和進士第大中中拜武寧節度使不能治軍補闕鄭
魯言新麥未登徐必亂既而軍亂果逐廓按舊史廓有詩名大中末累官
至潁州刺史再爲觀察使子晝亦登進士第

廓長安少年行云金紫少年郎繞街鞍馬光身從左中尉官屬右春坊剗
戴揚州帽重薰異國香垂鞭踏青草來去杏園芳又云追逐輕薄伴閒遊

不著緋長攏出獵馬數換打毬衣曉日尋花去春風帶酒歸青樓無晝夜
歌舞歇時稀又云日高春睡足帖馬賞年華倒插銀魚袋行隨金犢車還
攜新市酒遠醉曲江花幾度歸侵黑金吾送到家又云好勝耽長夜天明
燭滿樓留人看獨腳賭馬換偏頭樂奏曾無歇杯巡不暫休時時遙冷笑
怪客有春愁又云遨遊攜豔妓裝束似男兒杯酒逢花住笙歌簇馬吹鶯
聲催曲急春色送歸遲不以聞街鼓華筵待月移又云賞春唯逐勝大宅
可曾歸不樂還逃席多狂慣衩衣歌人踏日起語燕捲簾飛婦好一作好婦唯

相妬倡樓不醉稀又云戟門連日閉苦飲惜殘春開鎖通新客教姬屈醉

人情一作請歌牽白馬自舞蹈紅茵時輩皆相許平生不負身又云新年高

殿上始見有光輝玉雁排方帶金鵝立仗衣酒深和椀賜馬疾打珂飛朝

下人曾看香街意氣歸又云遊市慵騎馬隨姬入坐車樓邊聽歌吹簾外

見鶯花樂眼從人鬧歸心畏日斜蒼頭來去報飲伴到倡家又云小婦教

鸚鵡頭邊喚醉醒犬嬌眠玉篋鷹掣撼金鈴碧地攢花障紅泥待客亭雖

然長按曲不飲不曾聽

雞鳴曲云星稀月沒入五更膠膠角角雞初鳴征人牽馬出門立辭妾欲
向安西行再鳴引頸簷頭下月中角聲催上馬纔分地色第二鳴旌旆紅
塵已出城婦人上城亂招手夫婿不聞遙哭聲長恨雞鳴別時苦不遣雞
栖近窗戶

鏡聽詞云匣中取鏡祀竈王羅衣掩盡明月光昔時長著照容色今夜潛
將聽消息前門地黑人來稀無人錯道朝夕歸更深弱體冷如鐵繡帶菱
花懷裏熱銅片銅片如有靈願得照見行人千里形云賞春詞發韻大字
猛士行云戰鼓驚沙惡天色猛士虬鬚眼前黑單于衣錦日行兵陣頭走
馬生擒得幽并少年不敢輕虎狼窟裏空手行云發不贊利和
送振武將軍云葉葉歸邊騎風頭萬里乾金裝腰帶重錦縫耳衣寒蘆酒
燒蓬煖霜鴻撚箭看黃河古城道秋雪白漫漫

小說載廓從其父程過三亭渡爲小石隱足痛以呼父程曰太華峯頭見

有仙人手跡黃河灘裏爭得隱人腳跟

廓落第詩云榜前潛制淚衆裏自嫌身氣味如中酒情懷似別人暖風張
樂席晴日看花塵盡是添愁處深居乞過春

姚合有送李廓侍御赴夏州詩云酬恩不顧名走馬覺身輕迢遞河邊路
蒼茫塞上城沙寒無宿雁虜近少閒兵飲罷揮鞭去傍人意氣生

李頻

頻字德新睦州人與里人方干善給事中姚合名為詩士多歸重頻走千
里丐其品藻合大加獎挹以女妻之乾符中以工部外郎為劍州刺史卒
吳州月夜與曹太尉話別詩云早晚更看吳苑月西齋長憶月當窗不知
明月誰家見應照離人隔楚江

送劉山人歸洞庭云卻共孤一作歸雲去高眠最上峯半湖垂早月中路入

疎鐘秋盡蟲聲一作草蟲急夜深深山雨重當時同隱者分得幾株松首聯全唐詩作君逐

雲山去人閒又絕蹤末聯作平生心未已豈得更相從

湖口送友人云中流欲暮見湘煙葦岸無窮接楚田

一作天

去雁遠衝雲夢

澤離人獨上洞庭船風波盡日依山轉星漢通宵向水連零落梅花過殘

臘故園歸去醉

一作及新年

過四皓廟云東西南北人高跡自相親天下已歸漢山中猶避秦龍樓曾
作客鶴氅不爲臣獨有千年後青青廟木春

陝下懷歸云故園何處在零落五湖東日暮無來客天寒有去鴻大河冰
徹塞高岳雪連空獨夜懸歸思迢迢永漏中

鄭谷哭建州李員外詩云令終歸故里末歲道如初舊友誰爲誌清風豈
易書雨墳生野蕨鄉奠釣江魚獨夜吟還泣前年伴直廬

羅隱題方干詩云中閒李建州夏汭偶同遊顧我論佳句推君最上流九
霄無鶴版雙鬢老漁舟世難方如此何當浣旅愁

姚合答頻詩云一年離九陌壁上掛朝袍物外詩情遠人閒酒味高思歸
知病長失寢覺勤勞衰老無多思因君把筆毫

賈馳

秋入關詩云河上微風來關頭樹初溼今朝關城吏又見孤客入上國誰與期西來徒自急

馳唐末人會昌閒陸貞洞王滌輩題三鄉詩馳後留贈云壁古字未滅聲長響不絕蕙質本如雲松心應耐雪耿耿離崖谷悠悠望甌越杞婦哭夫時城崩無此說

馳有秋入關詩及東風吹曉霜雪鳥雙雙來之句張爲取作主客圖

薛能

能字大拙汾州人會昌六年進士大中八年書判入等補盩厔尉辟太原陝虢河陽從事李福鎮滑州表觀察判官歷侍御史都官刑部員外郎福徙西川取爲節度副使咸通中攝嘉州刺史歸朝遷主客度支刑部郎中俄刺同州京兆尹溫漳貶命權知尹事出領感化節度入授工書復節度徐州徙忠武廣明元年徐兵赴潞水經許能以前帥徐軍吏懷恩館之州

內許軍懼徐人見襲大將周岌因衆怒遂能自稱留後能全家遇害

能申湖詩云昔年依峽寺每日見申湖下淚重來此知心一已無雨淋舟
色暗岸拔木形枯舊境深相惱新春宛不殊方來尋熟侶起去恨驚鳥忍
事花何笑喧吟瀑正羸堪憂從宦到倍遣曩懷孤上馬終迴首傍人怪感
吁

謝劉相寄天柱茶云兩串春團敵夜光名題天柱印維揚偷嫌曼倩桃無
味搗覺嫦娥藥不香惜恐被分緣利市盡應難覓爲供堂羸官寄與眞拋
卻賴有詩情合得嘗

獻僕射相公云清如冰玉重如山百辟嚴趨禮絕攀強虜外聞應破膽平
人長見盡開顏朝廷有道青春好門館無私白日閒致卻垂衣更何事幾
多詩合詠關關

從事蜀川日每短諸葛功業其詩曰流運有功終是撓陰符多術得非姦
又云陣圖誰許可廟貌我挪揄又云焚卻蜀書宜不讀武侯無可律吾身

能後鎮徐州上元夜偶作云誰見將軍心似海四更親領萬人遊自負如此東軍亂被害

上元詩偃王燈塔古徐州二十年來樂事休此日將軍心似海四更身領萬人游又云十萬軍城百萬燈酥油香暖夜如蒸紅妝滿地煙光好祇恐

笙歌引上昇其後死於徐州

能鎮徐慕容一作時溥劉巨容周岌俱在麾下未數年溥鎮徐巨容鎮襄岌

鎮許俱假端揆故能詩曰舊將已為三僕射病身猶是六尚書

能題後集曰詩源何代失澄清處處狂波汙後生常感道孤吟有淚卻緣風壤語無情難甘惡少欺韓信枉被諸侯殺禰衡縱到緱山也無益四方聯絡盡蛙聲青春背我堂堂去白髮催人故故生此能詩也然無子美大雅之度

鄭谷讀故許昌薛尚書詩集作云篇篇高且真真為國風陳澹薄雖師古

縱橫得意新翦裁成幾帙近世詩人述作公篇什最多唱和和誰人華嶽題無敵黃河

句絕倫華岳黃河二詩序云皆吟殘荔枝雨詠徹海棠春公有海棠荔枝

美老於西蜀李白欺前輩公有寄符郎中云我生若在陶潛仰後塵公論詩

而無此詠一章云李白終無難忘嵩室下山公巨篇不負蜀江濱公常從事蜀屬思看

山眼冥搜倚樹身楷模勞夢想諷誦爽精神筆落空追愴曾蒙借斧斤

秋夜旅舍寓懷云夜鎖荒蕪獨夜吟西風吹動古人心三秋木落半年客

滿地明月何處砧漁唱亂沿汀鷺合鴈聲寒咽隴雲深平生只有松堪對

露浥霜欺不受侵

許州題德星亭云漢水南流東有堤堤邊亭是武林溪槎松配石堪僧坐

藥杏含春欲鳥啼高處月生滄海外遠郊山在夕陽西頻來不似軍從事

只戴紗巾曳杖藜

褒斜道中云十驛褒斜到處慵眼前常似接靈蹤江遙旋入旁來水山闊

猶藏向後峯鳥徑惡時應立虎畬田開日自燒松行吟卻笑公車役夜發

星馳半不逢

曹鄴

鄴能文有特操咸通初為太常博士白敏中卒議諡鄴責其病不堅退且

逐諫臣

懿宗中病足求避位不許補闕立敏中請無使有恃寵曠責之王譜奏願所譏帝怒斥譜

舉怙威肆行諡曰醜

高元裕子璩懿宗時為相卒鄴建言璩為宰相交游醜雜進取多蹊諡法
不思妄愛曰刺請諡為刺

讀李斯傳云欺暗常不然欺明當自戮難將一人手掩得天下目

杏園即席上同年云歧路不在天十年行不至一旦公道開青雲在平地

枕上數聲鼓衡門已如市白日探得珠不待驪龍睡恁恁出九衢僮僕顏

色異故衣未及換尚有去年淚晴陽照花影落絮浮野翠對酒時忽驚猶

疑夢中事自憐孤飛鳥得接鸞鳳翅永懷共濟心莫起胡越意

鄴字業之大中進士也唐末以禮部郎中知洋州

鄰女面上花空牀常對影況妾不嫁容甘為瓶墮井句右張為取此句泊

讀李斯傳杏園上同年詩作主客圖

老圃堂詩云邵平瓜地接吾廬穀雨乾時手自鋤昨日春風欺不在就牀
吹落讀殘書

送人歸南海云數片紅霞映夕陽攬君衣袂更移觴行人莫歎碧雲曉上
國每年春草芳雪過藍關寒氣薄鴈迴湘浦怨聲長應無惆悵滄波遠十

二重樓非我鄉

右二章章莊
取爲又玄集

裴虔餘

咸通末虔餘佐北門李公淮南幕李蔚嘗遊江舟子刺舟竹篙濺水溼近坐
之衣公色變虔餘紀一絕云滿額鵝黃金縷衣翠翹浮動玉釵垂從教水
濺羅衣溼知是巫山行雨歸公極懽令謳者傳之

陳陶

朝元引四闋云帝燭熒煌下九天蓬萊宮曉玉爐煙無央鸞鳳隨金母來
賀薰風一萬年又云玉殿雲開露冕旒下方珠翠壓鰲頭天雞唱罷南山
曙春色先歸十二樓又云萬寓靈祥擁帝居東華元老薦屠蘇龍池遙望

非煙拜五色曠曠在玉壺又云寶祚河宮一向清龜魚天篆益分明近臣
誰獻登封草五嶽齊呼萬歲聲

閒居雜興云一顧成周力有餘白雲閒釣五溪魚中原莫道無麟鳳自是
皇家結網疎又云長壽真人王子喬五松山月伴吹簫從他浮世悲生死
獨駕蒼龍入九霄

池塘生青草云謝公遺詠處池水夾通津古往人何在年來草自春色宜
波際綠香異雨中新今日青青意空悲行路人

北夢瑣言云大中年陶歌詩似負神仙之術或露王霸之說其詩云江湖
水清淺不足掉鯨尾又云飲來狼子瘦思入鷓鴣寒又云中原莫道無麟
鳳自是皇家結網疎又一鼎雄雌金液火十年寒暑鹿麕衣又云寄語東
流任班鬢向隅終守鐵梭飛諸如此例不可殫紀貫休書西山陳陶處士
隱居云有叟傲堯日髮白肌膚紅妻子亦讀書種蘭清溪東白雲有奇色
紫桂含天風卽應迎鶴書肯羨於洞洪又云高步前山前高歌北山北數

載賣柑橙山資近又足

陶種柑橙令山童賣之

陶劍浦人居南昌之西山宋齊邱守南昌因有蒲安之覲乃自詠云中原莫道無麟鳳自是皇家結網疎與水曹任晚郎中又善寄晚詩云好向明時薦遺逸莫教千里弔靈均江南後主卽位知其運祚衰替以修養爲事故詩曰乾坤見了文章懶龍虎成來印綬疎嚴尙書字鎮豫章遣小妓號蓮花者往西山侍陶陶殊不顧妓爲詩曰蓮花爲號玉爲腮珍重尙書遣妾來處士不生巫峽夢虛勞神女下陽臺陶答之曰近來詩思清如月老大心情薄似雲已向昇天得門戶錦衾深媿卓文君

陶唐末自稱布衣開寶中人或見之或云已得仙矣蟬聲將月短草色與秋長句比屋歌黃竹何人撼白榆句右張爲取作主客圖

陶題徐穉湖亭云伏龍山橫洲渚地人如白蘋自生死洪崖成道二千年唯有徐君播青史方干哭陶詩云雖云掛劍來墳上亦恐藏書在壁中

唐詩紀事卷第六十

唐詩紀事卷第六十一

聶夷中 劉象 紀唐夫 羅紹威 鄭仁表

張林 李搏 裴廷裕 高蟾 宋豈

崔塗 孫郃 鄭準 章碣 于濟

聶夷中

夷中有公子行云種花滿西園花發青樓道花下一禾生去之為惡草又
詠田家詩云父耕原上田子斲山下荒六月禾未秀官家已修倉又云二
月賣新絲五月糶新穀醫得眼前瘡剜卻心頭肉我願君王心化作光明
燭不照綺羅筵偏照逃亡屋所謂言近意遠三百篇之正也咸通十二年
高湜知舉榜內孤寒者夷中公秉億許棠夷中尤貧苦精古詩
夷中字坦之咸通中為華陰尉

劉象

鷺鷥詩潔白孤高性不同頂絲清輒冷搖風窺魚翹立荷香裏慕侶低翻

柳影中幾日下巢辭紫閣多時凝日向晴空摩霄志在潛脩羽會接鸞凰
別葦叢

象京兆人天復元年與曹松輩同登第號五老榜

象詠仙掌詩時號劉仙掌詩云萬古亭亭倚碧霄不成奇刻不成招何當
掬取天池水洒向人間救旱苗

紀唐夫

開成中執政惡溫庭筠擾場屋黜隨州縣尉唐夫送以詩曰何事明時泣
玉頻長安不見杏園春鳳凰詔下雖沾命鸚鵡才高卻累身且飲綠醪消
積恨莫思黃綬拂行塵方城若比長沙遠猶隔千山與萬津

唐夫驄馬云連年出塞踏沙蓬豈比當時御史驄逐北自諳深磧路連嘶
誰念靜邊功登山每與青雲合弄影應知碧草同今日虜平將換妾不如
羅袖舞春風

羅紹威

唐末襲父洪信爲魏博節度使喜爲詩江東羅隱有詩名紹威厚禮之與通屬籍目己所爲詩號偷江東集如樓前淡淡雲頭日簾外蕭蕭雨腳風無愧隱矣

紹威形貌魁偉有英雄氣好招延文學士開館聚書萬卷每歌酒宴會與賓佐賦詩頗有情致羅隱贈紹威詩云寒門雖得在諸宗棲北巢南恨不同馬上固慙銷髀肉幄中猶美愈頭風蹉跎歲月心仍切迢遞江山夢未通深荷吾人有知己好將筆力當英雄

鄭仁表

贈美人云嚴吹如何下太清玉肌無疹六銖輕自知不是流霞酌願聽雲和瑟一聲嘗有詩曰文章世上爭開路閱閱山東枉破天
仁表經過滄浪峽憩于長亭驛吏堅進一板仁表走筆云分峽東西路正長行人名利火然湯路傍著榜滄浪峽真是將閒攪撩忙

仁表豪爽有文常以門閱文章自高曰天瑞有五色雲人瑞有鄭仁表傲

縱多所凌藉人畏薄之仕爲起居郎爲劉鄴所惡貶死嶺外鄴少時投文于仁表之父洎仁表嗤鄙之鄴爲相仁表貶死

張林

林擢進士第官至御史爲詩小巧多採景於園林亭沼云菱葉乍翻人採後芰荷初沒舸行時亦佳句也林言毀佛寺時御史有蘇監察者檢天下廢寺見銀佛一尺以下者多袖而歸時號蘇捏佛溫庭筠遽曰好對蜜陀僧

李搏

僖宗在成都廷裕登第搏以詩賀曰銅梁千里曙雲開仙籙新從紫府來天上已張新羽翼世閒無復舊塵埃嘉禎果中君平卜賀喜須斟卓氏杯應笑戎藩刀筆吏至今泥滓曝魚腮旣而復謔之曰曾隨風水化凡鱗安上前門一字新聞道蜀江風景好不知何似杏園春裴有六韻答曰何勞問我成都事一報君知便納降蜀柳籠堤煙羸羸海棠當戶燕雙雙富春

不並窮師子濯錦全勝早曲江高捲絳紗楊氏宅

時主文寓楊子巷故有此句

半垂紅

袖薛濤牕浣花泛鷁詩千首靜衆尋梅酒百缸若說絃歌與風景主人兼是碧油幢

搏登乾符進士第

裴廷裕

廷裕字膺餘昭宗翰林學士左散騎常侍乾寧中在內庭文書敏捷號下

水船後貶湖南卒

梁時姚洎爲學士人號急灘頭下水船

廷裕偶題云微雨微風寒食節半開半合木蘭花看花倚柱終朝立卻似淒淒不在家

高蟾

詠春詩曰明月斷魂清靄靄平蕪歸思綠迢迢人生莫遣頭如雪縱得春風亦不消

金陵晚望云曾伴浮雲悲晚翠猶陪落日泛秋聲世閒無限丹青手一片

唐詩紀事

卷第六十一

三

無錫丁氏校刊

傷心畫不成

鄭谷贈詩云張生故國三千里知者惟應杜紫微君有君恩秋後葉可能更羨謝玄暉蓋蟾有宮詞云君恩秋後葉日日向人疎

蟾初落第詩天上碧桃和露種日邊紅杏倚雲栽芙蓉生在秋江上不向東風怨未開胡曾亦有下第詩云翰苑何時休嫁女文昌早晚罷生兒上林新桂年年發不許平人折一枝時謂蟾無躁競心後登第乾符中爲中丞

宋邕 一作雍

春日云輕花細葉滿林端昨夜春風曉色寒黃鳥不堪愁裏聽綠楊宜向雨中看僞蜀韋毅取此詩爲才調集唐末五雲溪人范攄云宋雍初無令譽及嬰瞽疾而詩名始彰或戲其詩云綠楊宜向雨中看所謂無眼作有眼之詩

崔塗

春夕旅懷云水流花謝兩無情送盡東風過楚城蝴蝶夢中家萬里杜鵑
枝上月三更故園書動多年絕華髮春惟兩鬢生自是不歸歸便得五湖
煙景有誰爭

蜀城春云天涯憔悴身一望一霑巾在處有芳草滿城無故人懷才皆得
路失計自傷春清鏡不堪照鬢毛愁更新
塗字禮山光啟進士也

感花詩云繡輓香韉夜不歸少年爭認最紅枝東風一陣黃昏雨又到繁
華夢覺時

孫郃

郃古意云屈子生楚國七雄知其才介潔世不容跡合藏蒿萊道廢固命
也瓢飲亦賢哉何事葬江南空使後人哀

又云魏禮段干木秦王乃止戈小國有其人大國奈之何賢哲信爲美兵
甲豈云多君子戰必勝斯言聞孟軻

邵字希韓四明人與方干友善乾寧中登進士第好荀揚孟子之書學退之爲文爲校書郎中河南府文學其文爲錢珣所序詩有仕宦類商賈終日常東西之句

鄭準

江南清明云吳山楚驛四年中一見清明一改容旅恨共風連夜起韶光隨酒著人濃延興門外攀花別采石江頭帶酒逢無限歸心何計是路邊
戈甲正重重

準以文依荊州成中令泐常欲比肩陳阮自作所業爲三卷號劉表軍書其應舉日詩卷有題水牛云護犢橫身立逢人揭尾跳朝士大笑
準字不欺登乾寧進士第有渚宮集一卷

章碣

癸卯歲毗陵登高云流落常嗟勝會稀故人相遇菊花時鳳笙龍笛數巡酒紅樹碧山無限詩塵土十分歸舉子乾坤大半屬偷兒長楊羽獵須留

本開濟重爲闕下期

焚書坑詩云竹帛煙銷帝業虛關河空鎖祖龍居坑灰未冷山東亂劉項元來不讀書

上元夜建元寺觀燈呈通智上人云建元看列上元燈處處回廊鬪火層珠玉亂拋高殿佛綺羅深拜遠山僧臨風走筆思呈惠到曉行禪同伴能無限喧闐留不得月華西下露華凝

邵安石連州人高湘侍郎南遷歸闕途次連江安石以所業投獻遂挈至輦下湘主文安石擢第碣賦東都望幸刺之曰懶修珠翠上高臺眉月連娟恨不開縱使東巡也無益君王自領美人來

碣孝標之子登乾符進士第碣未第時方干贈詩織錦雖云用舊機抽梭起樣更新奇何如且破望中葉未可更攀低處枝藉地落花春半後打窗斜雪夜深時此時才子應吟苦吟苦鬼神知不知

于漬

苦辛吟隴上扶犁兒手種腹長饑窗前擲梭女手織身無衣我願燕趙姝
化爲嫫母姿一笑不直金自然家國肥

古宴曲云雉扇合蓬萊朝車迴紫陌重門集嘶馬言宴金張宅燕娥奉卮
酒低鬢苦無力十戶手胼胝鳳凰釵一隻高樓齊下視日照綺羅色笑指
負薪人不信生中國

思歸別云不耕南畝田誤愛東堂桂身同樹上花一落又經歲交親日相
薄知己恩潛替日開十二門自是無歸計

瀆字子漪咸通進士終泗州判官

唐詩紀事卷第六十二

鄭嵎

津陽門者華清宮之外闕南扃禁闈北走京道開成中嵎常得羣書下帷于石甕僧院而甚聞宮中陳跡焉今年冬自虢而來暮及山下因解鞍謀飡求客旅邸而主公年且艾自言世事明皇夜闌酒餘復爲嵎道承平故實翌日于馬上輒裁刻俚叟之語爲長句七言詩凡一千四百字成一百韻止以門題爲之目云耳

津陽門北臨通逵雪風獵獵飄酒旗泥寒款段蹶不進疲童退問前何爲酒家顧客催解裝案前羅列樽與卮青錢瑣屑安足數白醪軟美甘如飴開爐引滿相獻酬枯腸渴肺忘朝饑愁憂似見出門去漸覺春色入四肢主翁移客挑華燈雙肩隱膝烏帽欵笑云鮐老不爲禮飄蕭雪鬢霜垂頤問余何往凌寒曦顧翁枯朽郎豈知翁曾豪盛客不見我自爲君陳昔時時平親衛號羽林我纔十五爲孤兒射熊搏虎衆莫敵彎弧出入隨攸飛

開元中未有東西神策軍但以此六軍為親衛此時初構觀風樓樓高百尺堆華棖樓南更起鬪

雞殿神光山影相參差觀風樓在宮之外東北隅屬夾城而達于內前臨

遺址尚存唯門雞殿與毬場迤邐尚在其年十月移禁仗山下櫛比羅百司朝元閣成老君

見會昌縣改一作新豐移時有詔改新豐為會昌縣移自陰鼈故城置于

處成立降聖觀復改新豐為昭應縣麻字幽州曉進供奉馬玉珂寶勒黃金

始成令大將軍高力士率眾樂以樂之

羈安祿山每進馬必殊五王扈駕夾城路傳聲校獵渭水湄六軍各出射

生手一作羽林六軍各出射籠山絡野張置維雕弓繡鞞鞞一作鞞不知數翻身滅沒皆

蛾眉赤鷹黃鶻雲中來妖狐狡兔無所依人煩馬殆禽獸盡百里腥羶禾

黍稀申王有高麗赤鷹岐王有北山黃鶻逸氣奇姿特暖山度獵東風微

臘一作暖山度宮娃賜浴長湯池刻成玉蓮噴香液漱迴煙浪深透池宮內

奉兩湯池外內外更有湯十六所而長湯每賜諸嬪御其修廣與諸湯不

侔整以文瑤寶石中央有玉蓮捧湯泉噴以成池又縫綴錦繡為鳧雁于

水中上時于其閒泛犀屏象薦雜羅列錦鳧繡雁相追隨破簪碎鈿不足

拾金溝殘溜和纓綉上皇寬容易承事十家三國爭光輝繞牀呼盧恣樗

博張燈達晝相謾欺相君侈擬縱驕橫日從秦虢多游嬉朱衫馬前未滿
足更驅武卒羅旌旗楊國忠為宰相帶劍南節度使常與秦虢聯轡而出更于馬前以兩川旌節為導也畫輪寶軸

從天來雲中笑語聲融怡鳴鞭後騎何蹀躞宮妝禁禁一作襟袖皆仙姿青門

紫陌多春風風中數日殘香遺驪駒吐沫一奮迅路人擁篲爭珠璣事盡載在

國史中此下更重敘其事八姨新起合歡堂翽鷗賀燕無由窺萬金酬工不肯去矜能

恃巧猶嗟咨號國創一堂價費萬金堂成工人徵價之外更邀賞伎之直復受絳羅五千段工者嗤而不顧號國訝之問其由工曰某

生平之能殫于此矣苟不之信願得螻蟻蜥蜴蜂蠶之類數其目而投于堂中使有閒隙得亡一物即不論工直也于是又以繪綵珍貝與之山下

人至今話故事者尚四方節制傾附媚窮奢極侈沽恩私堂中特設夜明

枕銀燭不張光鑿帷號國夜明枕置于堂中光燭一室西瑤光樓南皆紫禁

梨園仙宴臨花枝迎娘歌喉玉窈窕蠻兒舞帶金葳蕤瑤光樓即飛霜殿之北門迎娘蠻兒

乃梨園弟子三郎紫笛弄煙月怨如別鶴呼羈雌玉奴琵琶龍香撥倚歌

促酒聲嬌悲上皇善吹笛常寶一紫玉管貴妃妙彈琵琶其樂器聞于人間者有遜遜檀龍香柏為撥者上每執酒卮必令迎娘歌水

調曲遍而太真輒彈絃倚歌為上送酒內飲鹿泉邊春露晞粉梅檀杏飄

唐詩紀事 卷第六十二 二 無錫丁氏校刊

朱墀金沙洞口長生殿玉蕊峯頭王母祠山城內多馴鹿乃齋殿也有事于朝

元閣即御長生殿以沐浴也禁庭術士多幻化上前較勝紛相持羅公如意奪顏色三

藏袈裟成散絲上頗崇羅公遠楊妃尤信金剛三藏上常幸功德院將謁

喜顧謂金剛曰上人能致此乎三藏曰此幻誑耳僧為陛下取真物乃于

袖中出七寶如意炳耀而光遠所進即時復為竹枝後一日楊妃為三

人定優劣時禁中將創小殿三藏乃舉一鴻梁于空中將中遠公之首公

遠不為動容上連命止之公遠飛符于他處竊三藏金襴袈裟于櫃中守

者不之見三藏怒又呪而取須臾而至遠蓬萊池上望秋月無雲萬里縣

清輝上皇夜半月中去三十六宮愁不歸月中祕樂天半聞玎璫玉石和

塤箎宸聰聽覽未終曲卻到人間迷是非葉法善常引上入月宮時秋已

半閒尙聞仙樂及上歸且記憶其半遂于笛中寫之會西涼都督楊敬述

進婆羅門曲與其聲調相符遂以月中所聞為之散序用敬述所進曲作

其腔而名霓裳羽衣法曲千秋御節在八月會同萬國朝華夷花萼樓南大合樂八音

九奏鸞來儀都盧尋樞誠齷齪公孫劍伎方神奇馬知舞徹下牀榻人惜

曲終更羽衣上有公孫大娘舞劍當時號為雄妙又設連榻人馬舞其上觀

衣執綺而被鈴鐸驥首奮鬣舉趾翹尾變態動容皆中音律又令宮妓梳

九綺仙髻衣孔雀翠衣佩七寶嬰珞為霓裳羽衣之類曲終珠翠可掃其

舞馬祿山亦將數疋以歸而私習之其後田承嗣代安有存者一旦于廐
上聞鼓聲頓挫其舞廢人惡之舉箠以擊之其馬尚謂怒未妍妙更奮鬣
宛轉曲盡其態厥恐以此告承嗣以祿山此時侍御側金雞畫障當罌罍繡
為妖遂戮之而舞馬自此絕矣

裊文祿日履鼻甘言狡計愈驕癡而上每坐及宴會必令祿山坐于御側

為子時以襍祿戲而加之上亦呼之祿兒每入宮必先拜貴妃然後拜上上笑而問其故對曰臣本蕃中人禮先拜母後拜父是以然也詔令

上路建甲第樓通走馬如飛鞞大開內府恣供給玉缶金筐銀篋箕時于

里南陌為祿山建甲第令中貴人督其事仍謂之曰卿善為部署祿山眼孔大勿令笑我至于篋筐篋箕缶之具咸金銀為之今回元觀即其故第

耳異謀潛熾促歸去臨軒賜帶盈十圍祿山肥博過人腹垂而忠臣張公

識逆狀日日切諫上弗疑張曲江先識其必反逆狀數言于上湯成

召浴果不至潼關已噓一作漁陽師御街一夕無禁鼓玉輅順動西南馳

其年賜柑子使回泣訴祿山反狀云臣幾不至生還上猶疑其言復遣使喻云我為卿造一湯待卿至使回答言反狀上然後憂疑即寇軍已至潼

矣關九門回望塵全多六龍夜馭兵衛疲縣官無人具軍頓行宮徹屋屠雲

螭時郊畿草擾無御頓之備上命馬嵬驛前駕不發宰相射殺冤者誰長

眉鬢髮作凝血空有君王潛涕洟青泥坂上到三蜀金堤城邊止九旂移

文泣祭昔臣墓度曲悲歌秋雁辭駕至蜀詔中貴人馳祭山川忽憶水調

雁飛上泫然流涕顧問左右曰此誰人詩從臣對曰此李嶠詩復掩泣曰

謂才子也明年尚父上捷書洗清觀闕收封畿兩君相見望賢宮賢一作望

頓首君一作臣鼓舞皆歔歔望賢宮在咸陽之東數里車駕自蜀回肅宗迎駕

云不圖今日復觀兩君相見之禮駕將入開遠門上皇疑焉上先後入門

皇偏門而入先帝由正門而入後宮中親呼高驃騎潛令改葬楊真

妃花膚雪豔不復見空有香囊和淚滋時肅宗詔令改葬太真唯高力士

步當時乘輿卒遽無復備周身之具但以紫褥裹而窆之及改葬之時鸞

輿卻入華清宮滿山紅實垂相思飛霜殿前月悄悄迎春亭下風颼颼飛霜

殿即寢殿而白傅長恨歌以長生殿即為寢殿殊誤矣上雪衣女失玉籠

在長生鹿瘦銅牌垂象牀塵凝罨颯被畫檐蟲網頗梨碑太真養白鸚鵡

多辭上尤愛之字為雪衣女上常于芙蓉園中獲白鹿惟山人王昊識之

宜春苑中白鹿上由是愈愛之移于此山字之曰山客出止華清罨颯公

駕出宮後不知省及上歸南內一旦再入此宮而當時罽颯之被宛然碧而塵積矣上尤憾焉溫泉堂碑其石瑩徹見人形影宮中號為頗梨碑

菱花覆雲母陵風篁雨菊低離披真人影帳偏生草果老藥堂空掩扉真

李順興後周時修道北山神堯皇帝受禪真人潛告符契至今山下有祠字宮中有七聖殿自神堯至睿宗連寶后皆立衣袞衣繞殿石榴樹皆太

真所植俱臃腫矣南有功德院其間瑤壇羽鼎湖一日失弓劍橋山煙草

帳皆在焉順興影堂果老樂室亦在禁中也

俄霏霏空聞玉椀入金市但見銅臺飄繡帷開元到今踰十紀當初事跡

皆殘隳竹花唯養棲梧鳳水藻周游巢葉龜會昌御宇斥內典去留二教

分黃緇慶山汗瀦石甕毀紅樓綠閣皆支離奇松怪柏為樵蘇童山智谷

亡嶮巖煙中壁碎摩詰畫雲閒字失玄宗詩持國寺本名慶山寺德宗始改其額寺有綠額復道而上

天后朝以禁匠取宮中制度結搆之石甕寺開元中毀而創造精華清宮餘材修繕佛殿中玉石像皆幽州進來與朝元閣道像同日而至精妙無比叩

紅樓在飛殿之西巖下臨絕壁樓中有玄宗題詩草八分每一篇一體王

右丞山水兩壁毀之後皆石魚巖底百尋井銀牀下卷絲一作綆遲當

失之矣摩詰乃王維之字也

時清影蔭紅葉一旦飛埃埋素規石魚巖下有天絲石其形如甕以貯飛泉故上以石甕為寺名僧于上層飛

樓中懸轆轤引修絃長二百餘尺以汲甕泉出韓家燭臺倚林杪千枝燦

于紅樓喬樹之杪寺既毀折石甕今已埋沒矣

唐詩紀事卷第六十二四無錫丁氏校刊

若山霞摛昔年光彩奪天月今

一作昨

日銷鎔當路歧

韓國為千枝燈臺高八尺置于山上每

至上元夜則燃之千光奪月凡百里之內皆可望焉

龍宮御榜高可惜火焚牛挽臨崎嶇孔雀松殘

赤琥珀鴛鴦瓦碎青瑠璃

寺額睿宗在藩邸中所題也標於危樓之上世傳孔雀松下有赤茯苓入土千年則成琥珀寺

之前峯古松老柏泊乎嘉草今皆樵蘇蕩除矣

今我前程能幾許徒有餘息筋力羸逢君話此空

灑涕卻憶歡娛無見期主翁莫泣聽我語寧勞感舊休吁嘻河清海宴不

難覩我皇已上昇平基湟中土地昔湮沒昨夜收復無瘡痍戎王北走棄

青冢虜馬西奔空月支兩逢堯年豈易偶願翁頤養豐膚肌平明酒醒便

分首今夕一罇翁莫違

唐詩紀事卷第六十三

方干

劉駕

王駕

衛準

詹雄

顧非熊

司空圖

秦韜玉

潘誠

胡駢

高駢

潘緯

武瓘

于鄴

路德延

翁承贊

韓垂

方干

早春云運行元化不參差四極中華共一時正氣纔隨灰律變殘寒便被柳條欺冰融大澤朝陽覺草綠陳根夜雨知不信風光疾如箭年來年去變霜髭

越州使院竹云莫見凌雲飄粉籜須知礙石作盤根細看枝上蟬吟處猶是笋時蟲食痕月送綠陰斜上砌露凝寒色溼遮門列仙終日逍遙地鳥雀潛來不敢喧

除夜云玉漏斯須即達晨四時吹轉任風輪寒燈短燼方燒臘畫角殘聲

已報春明日便爲經歲客
昨朝猶是少年人
新正定數隨年減
浮世惟應百徧新

干爲人野質每見人設三拜曰禮數有三識者呼爲方三拜爲人脣缺連應十餘舉遂歸鏡湖後十數年遇醫補脣年已老矣鏡湖人號曰補脣先生鏡湖西島閒居詩曰寒居壓鏡心此處是家林梁燕欺春醉巖猿學夜吟雲連平地起月向白波沈猶自聞鐘角棲身可在深又云世人如不容

吾自縱天慵落葉憑風掃秋

一作香

粳任

一作情

水春花朝連郭霧雪夜隔湖

鐘身在能無事頭宜白此峯又感懷云至業不得力到今猶苦吟吟成五字句用破一生心世路屈聲滿雲溪冤烝深前賢多晚達莫怕鬢霜侵干爲詩如鶴盤遠勢投孤嶼蟬曳殘聲過別枝齊梁已來未之有也

孫邵哭玄英方先生云斗牛文星落知是先生死湖上聞哭聲門前見彈指官無一寸祿名傳千萬里死著紙衣裳生誰念朱紫我心痛其語淚落不能已猶喜韋補闕揚名獻天子

干師徐凝干常刺凝曰把得新詩草裏論反語曰村裏老餘杭守謂干苦吟未能應卒因夜燕以飛字韻命賦之干詩立成曰閒世仙郎夜燕時丁寒漏滴聲微琵琶絃促千般調鸚鵡杯深四散飛徧請玉容歌白雪高燒紅燭照朱衣人閒有此榮華事爭遣漁翁戀釣磯

唐末宰臣張文蔚中書舍人封舜卿奏名儒不遇者十有五人請賜一官以慰其魂干其一也

干寄李頻云山木又搖落望君還不還軒車何處去雨雪滿前山思苦寒星動鄉遙釣渚閒明年見名字唯我獨何顏又有題桃花塢周處士別業云細泉出石飛難盡孤燭和雲溼不明何事懶于稽叔夜更無書札答公卿又貽天目中峯客有枯井夜聞隣果落廢巢寒見別禽來之句張爲取作主客圖

吳融贈干詩曰把筆盡爲詩何人獻天子句滿天下口名聒天下耳不識朝不識市曠逍遙閒徙倚一杯酒無萬事一葉舟無千里衣裳白雲坐臥

流水霜落風高忽想憶惠然見訪留一夕一夕聽吟十數篇水榭林蘿爲
岑寂拂旦拾我亦不辭攜筇徑去隨所適無處覓雲半片鶴一隻

僧可朋贈干詩云盛名傳出自皇州一舉參差便縮頭月裏豈無攀桂分
湖中剛愛釣魚休童偷詩稿呈隣叟客乞書題謁郡侯獨泛短舟何限景
波濤西接洞庭秋

僧貫休贈詩云盛名與高隱合近謝敷村弟子已得桂先生猶灌園投綸

侵海介得句覓雲根白日昇天路知君別有門

弟子謂李頻也

僧虛中悼干云先生在世日祇向鏡湖居明主未巡狩白頭閒釣魚煙莎
一徑小洲島四隣疎獨有爲僧者時來弔舊廬

孫郃元英先生傳曰先生新定人字雄飛章八元卽先生外王父也廣明
中和閒爲律詩江之南未有及者始謁錢塘守姚公公視其貌陋初甚
侮之坐定覽卷駭目變容而歎之先生舉不得志遂遜于會稽漁于鑑湖
與鄭仁規李頻陶詳爲三益友弟子洪農楊弇釋子居遠及卒弇編其詩

請舍人王贊爲之序贊序云張祐升杜甫之堂方干入錢起之室云

劉駕

吳中懷古云句踐飲膽日吳王酒滿杯笙歌入海雲聲自姑蘇來西施舞
初罷侍兒整金篦衆女不敢妒自比泉下泥越鼓聲騰騰吳天隔塵埃難
將甬東地更學會稽栖霸跡一朝盡草中棠梨開

上巳云上巳曲江濱喧于市朝路相尋不見者此地皆相遇日光去此遠
翠幕張如霧何事歡娛中易覺春城暮物情重此節不是愛芳樹明日花
更多何人肯回顧駕與曹鄴友善工古風鄴大中時擢第不出京候駕登
科同去

馬上續殘夢馬嘶時復驚心孤多所慮僮僕近我行句只恐塞上山低于
沙中骨句蒲帆出浦去但見浦邊樹不如馬行郎馬跡猶在路大舟不相
載買宅令妾住莫道留金多本非愛郎富句右張爲取作主客圖

王駕

司空圖喜王駕小儀重陽相訪云白菊初開臥內明聞君相訪病身輕燈
前且撥傷心事谿上還隨覓句行幽鶴傍人疑舊識殘蟬向日噪新晴擬
將寂寞同留住且勸康時立大名

僖宗幸蜀駕下第還浦中鄭谷以詩送云孤單取仕休言命早晚逢人苦
愛詩後有次韻王駕校書結綬見寄之什云直應歸諫苑方肯別山村勤
苦常同業孤單共感恩

駕夏雨詩云非惟消旱暑且喜救生民天地如蒸溼園林似卻春洗風清
枕席換夜失埃塵又作豐年望田夫笑向人

駕字大用河中人登大順進士第仕至禮部員外郎自稱守素先生與圖
谷相爲詩友

衛準

莫言閒話是閒話往往事從閒話來句何必剃頭爲弟子無家便是出家
人句右張爲取作主客圖

準大歷五年登進士第

詹雄

塵飛遺恨盡花落古宮平

洛陽古城句

紅粉笙歌人代遠月明陵樹水東流

銅雀

臺右張爲取作主客圖

顧非熊

寄費冠卿云先生九華隱鳥道隔塵埃石室和雲住山田引燒開久閒仙
客降高臥詔書來一入深林去人閒更不回

長安清明言懷云明時帝里遇清明還逐遊人出禁城九陌芳菲鶯自囀
萬家車馬雨初晴客中下第逢今日愁裏看花厭此生春色來年誰是主
不堪憔悴更無成非熊滑稽好凌轢在舉場垂三十年長慶中登第劉得
仁賀以詩云愚爲童稚時已解念君詩及得高科晚須逢聖主知成名歸
茅山項斯送以詩曰吟詩三十載成此一名難自有恩門入全無帝里歡
湖光愁裏碧巖影夢中寒別後杉松月何人共曉看非熊大中時自盱眙

簿棄官隱茅山

非熊況之子段成式云況始喪子年七十況哭之曰老人喪愛子且暮哭成血聲逐斷猿悲跡隨飛鳥滅老夫已七十不作多時別後再生子七歲其兄戲批之忽曰我爾之兄何故批我乃敍前生事歷歷不誤卽非熊也姚合送非熊下第歸越詩云失意尋歸路親知不便過家山向城遠日月在船多楚塞數逢雁浙江長有波秋風別卿老還聽鹿鳴歌賈島寄非熊詩云知君歸有處山水亦難齊猶去瀟湘遠不聞猿狖啼穴通茅嶺下潮滿石城西獨立生遙思秋原日漸低

司空圖

圖與李生論詩云文之難而詩之難尤難古今之喻多矣而愚以辨于味而後可以言詩也江嶺之南凡是資于適口者若醯非不酸也止于酸而已若醢非不鹹也止于鹹而已華之人所以充饑而遽輟者知其鹹酸之外醇美者有所乏耳彼江嶺之人習之而不辨者宜哉詩貫六義則諷諭

抑揚淳蓄淵雅皆在其閒矣然直致所得以格自奇前輩諸集亦不專工於此矧其下者耶王右丞韋蘇州澄澹精緻格在其中豈妨于適舉哉賈閔仙誠有警句視其全篇意思殊餒大抵附寒澁方可置才亦爲體之不備也矧其下者哉噫近而不浮遠而不盡然後可以言韻外之致耳愚幼嘗自負既久而愈覺缺然得于春早則有草嫩侵沙長冰輕著雨消又人家寒食月花影午時天又雨微吟思足花落夢無聊得于山中則有坡暖冬生筍松涼夏健人又川明虹照雨樹密鳥衝人得于江南則有成鼓和潮暗船燈照島幽又曲塘春盡雨方響夜深船又夜短猿悲滅風和鵲喜靈得于塞下則有馬色經寒慘鵬聲帶晚饑得于喪亂則有驂騮思故第鸚鵡失佳人又鯨鯢人海魍魎棘林幽得于道宮則有棋聲花院靜幡影石壇高得于夏景則有地涼清鶴夢林靜肅僧儀得于佛寺則有松日明金像苔龕響木魚又解吟僧亦俗愛舞鶴終卑得于郊原則有遠坡春旱慘猶有水禽飛得于樂府則有晚妝留拜月春睡更生香得于寂寥則有

孤螢出荒地落葉穿破屋得于愜適則有客來當意愜花發遇歌成雖庶
幾不濱于淺涸亦未廢作者之譏訶也七言云逃難人多分隙地放生鹿
大出寒林又得劍乍如添健僕亡書久似憶良朋又孤嶼池痕春漲滿小
欄花韻午晴初又故國春歸未有涯小欄高檻別人家五更惆悵迴孤枕
猶自殘燈照落花又甲子今重數生涯只自憐殷勤元昨日傍午又明年
皆不拘一槩也蓋絕句之作本於詣極此外千變萬狀不知所以神而自
神也豈容易哉今足下之詩時輩固有難及儻復以全美爲上卽知味外
旨矣

與王駕評詩云末伎之工雖蒙譽於賢哲未足自信必俟推于其類而後
神躍而色揚今之贊藝者反是若卽醫而斬其病也唯恐彼之善察藥之
我攻耳以爲率人以謾莫能自振痛哉且工之尤者莫若伎于文章其能
不死於詩者比他伎尤寡豈可容易較量哉國初主上好文雅風流特盛
沈宋始興之後傑出于江寧宏肆于李杜極矣右丞蘇州趣味澄復若清

沅之貫達大曆十數公抑又其次焉力勅而炁孱乃都市豪估耳劉公夢得楊巨源亦各有勝會閬仙無可劉得仁輩時得佳致亦足滌煩厥後所聞愈褊淺矣然河汾蟠鬱之炁宜繼有人今王生者寓居其閒沈漬益久五言所得長于思與境偕乃詩家之所尙者則前所謂必推于其類豈止神躍色揚哉經亂索居得其所錄尙累百篇其勤亦至矣吾適又自編一鳴集且云撐霆裂月劫作者之肝脾亦當吾言之無忤也

王禹偁五代史闕文云圖字表聖自言泗州人有俊才咸通中登進士第雅好爲文躁于進取頗自矜伐端士鄙之從事使府泊登朝驟歷清顯巢賊之亂車駕播遷圖有先人舊業在中條山極林泉之美圖自禮部員外郎避地焉日以詩酒自娛屬天下版蕩士人多往依之互相推獎由是聲名籍甚昭宗反正以戶部侍郎召至京師圖旣負才慢世謂己當爲宰輔時人惡之稍抑其銳圖憤憤謝病復歸中條與人書疏不名官位但稱知非子又稱耐辱居士其所居在禎貽谿之上結茅屋命曰休休亭嘗自爲

亭記云云

史舊文

謹案圖河中虞鄉人少有文采未爲鄉里所稱會王凝

自尙書郎出爲絳州刺史以文謁之大爲凝知入知制誥遷中書舍人知貢舉擢圖上第頃之凝出爲宣州觀察使辟圖爲從事既渡江御史府奏圖監察下詔追之圖感凝知己恩不忍輕離幕府滿百日不赴闕爲臺司所劾遂以本官分司久之詔拜禮部員外郎俄知制誥故集中有文曰戀恩稽命黜繫洛師于今十年方參綸閣此豈躁于進取者耶舊史不詳一至于圖見唐政多僻中官用事知天下必亂卽棄官歸中條山尋以中書舍人召拜禮部戶部侍郎皆不起及昭宗播遷華下圖以密邇乘輿卽時奔問復歸還山故其詩曰多病形容五十三誰憐借笏趁朝參此豈有意干相位耶河中節度使王重榮請圖撰碑得絹數千疋圖致于虞鄉市中恣鄉人所取一日而盡是時盜賊充斥獨不入王官谷河中士人依圖避難獲免者甚衆昭宗東遷又以兵部侍郎召至洛下爲柳璨所沮一謝而退梁祖受禪以禮部尙書召辭以老病卒時年八十餘又案梁室大臣

如恭

本敬字
犯廟諱

翔李振杜曉楊涉等皆唐朝舊族本以忠義立身重侯累將

三百餘年一旦委質朱梁其甚者贊成弑逆唯圖以清直避世終身不仕

梁祖故梁史拾圖小瑕以泯大節者良有以也裴晉公赴敵淮西題名華

岳之闕門大順中圖以絕句紀之云岳前大隊赴淮西從此中原息戰鞏

石闕莫教苔蘚上分明認取晉公題題休休亭之楹曰咄諾休休休莫莫

莫伎倆雖多性靈惡賴是長教閒處著休休休莫莫一局棋一爐藥天

意時晴且料度白日偏催人快活黃金難買堪騎鶴若曰爾何能答云耐

苦莫柳璨爲相臣僚多被放逐圖爲監察御史尤加畏慎昭宗郊禮畢上

章懇乞致仕曰察臣本意非爲官榮可驗衰羸庶全名節上特賜歸山其

詔略曰旣養高以傲世類移山以釣名心惟樂于漱流任非顛于食祿匪

夷匪惠特忘反正之朝載省載思當遂遯棲之志宜放歸中條山詔辭乃

璨之文也時多以四皓二疏譽之惟僧虛中云道裝汀鶴識春醉野人扶

言其操履檢身非傲世者也又云有時看御札特地掛朝衣言其尊戴存

誠非要君也

退栖云宦遊蕭索爲無能移住中條最上層得劍乍如添健僕忘書久似
憶良朋燕昭不是空憐馬支遁何妨亦愛鷹自致此身繩檢外肯教世路
日兢兢

華下云日炙旱雲裂迸爲千道血天地沸一鑊竟自烹妖孽堯湯遇災數
災數還中輟何事姦與邪古來難撲滅

僧舍貽友人云笑破人閒事吾徒莫自欺解吟僧亦俗愛舞鶴終卑竹上
題幽夢溪邊約敵碁舊山歸有阻不是故遲遲

長安贈王法一作注云正下搜賢詔多君獨避名客來當意愜花發遇歌成

樂地留高趣權門讓後生東風閒小駟園外好同行

下方云昏旦松軒下怡然對一瓢雨微吟思一作春未足足花落夢無聊細事

當碁遣衰容喜鏡饒溪僧有深趣書至又相邀

黃巢陷長安孫樵赴歧隴授職方員外詔書曰行在三絕以常侍李隲有

曾閱之行圖有巢由之風樵有揚馬之文故也

秦韜玉

對花云長與韶光暗有期可憐蜂蝶卻先知誰家促席臨低樹何處橫釵帶小枝麗日多晴疑曲照和風得路合偏吹向人強道渾無語幾勸王孫到醉時

貧女云蓬門未識綺羅香擬託良媒亦自傷誰愛風流高格調共憐時世儉梳妝敢將十指誇纖巧不把雙眉鬪畫長每恨年年壓金線爲他人作嫁衣裳

貴公子行云堦前莎毯綠不捲銀龜噴香晚

一作挽

不斷亂花織錦柳撚線

妝點池臺畫屏展主人公業傳國初六親聯絡馳朝車鬪雞走狗家世事抱來皆佩黃金魚卻笑儒生把書卷學得顏回忍饑面

韜玉字仲明京兆人父爲左軍將韜玉出入田令孜之門又與劉曄李巖士姜垺蔡鋌之徒交遊中貴各將兩軍書尺僥求巍科時謂對軍解頭僖

宗幸蜀韜玉以工部侍郎爲令孜神策判官小歸公主文韜玉准敕及第
仍編入榜中韜玉以書謝新人呼同年曰三條燭下雖阻門闌數仞墻邊
幸同恩地

潘誠

棧踏猿聲暮江看劍影秋

送人遊蜀句

僧老白雲上聲寒高鳥邊

句心已同猿

狄不聞人是非

句

三月獨立看花月只欠子規啼一聲

長安句

行人渡流水

白馬入前山

句

秋深雪滿黃雲塞夜夜鴻聲入漢陽

句

右張爲取作主客

圖

胡駢

經費拾遺舊隱詩云林下茅齋已半傾九華幽逕少人行不將冠劍爲榮
事只向煙蘿寄此生松竹漸荒池上色琴書徒立世閒名白楊風起秋山
暮時復哀猿啼一聲

駢唐末進士也

高駢

駢鎮蜀日以南詔侵暴築羅城四十里朝廷雖加恩賞亦疑其固護或一日聞奏樂聲響知有改移乃題風箏寄意日夜靜絃聲響碧空宮商信任往來風依稀似曲才堪聽又被移將別調中旬日報到移鎮渚宮

駢好爲詩雅有奇藻其言懷詩曰恨乏平戎策慙登拜將壇手持金鉞冷身掛鐵衣寒主聖扶持易恩深報効難三邊猶未靜何敢便休官

二妃廟云帝舜南巡去不還二妃幽怨水雲閒當時珠淚垂多少直到如今竹尚斑

雪詩云六出花飄入戶時立看修竹變瓊枝逡巡好上高樓看蓋盡人閒惡路歧

聽歌詩云公子邀歡月滿樓佳人揭調唱伊州便將席上秋風起直到蕭關水盡頭

寄僧筇竹杖詩云堅輕筇竹枝一杖有九節寄與沃州僧閒走秋山月

光啓三年駢鎮淮海三月看花駢與諸從事言詩其末云人閒無限傷心事不得罇前折一枝蓋亡滅之讖也及被幽辱計口給食自五月至八月外圍益急遂及于難

駢字千里崇文孫也生于長慶之首卒于光啓之閒家世禁衛頗修飭折節爲文學與諸儒交硜硜談治道兩軍中人更稱譽之號落鵬侍御赴安南卻寄台司云曾驅萬馬靜江山風去雲回頃刻閒今日海門南面事莫教還似鳳林關

步虛詞云青溪道士人不識上天下地鶴一隻洞門深銷碧窗寒滴露研朱點周易

題羅浮別業云不將直性染埃塵爲有煙霞伴此身帶月長江好歸去博羅山下碧桃春

聞河中王鐸加都統云煉汞燒鉛四十年至今猶在藥爐前不知子晉緣何事只學吹簫便得仙

其驕傲不平如此

潘緯

中秋月云古今逢此意共冀沈寥明豈是月華別祇應秋氣清影當中土
正輪對八荒平謝客徒留望璿璣自有程

琴云客來鳴素琴惆悵對遺音一曲起于古幾人聽到今盡含風靄遠自
泛月煙深夙續水山操坐生方外心湘南何涓瀟湘賦緯古鏡詩天下傳
之或曰潘緯十年吟古鏡河涓一夜賦瀟湘登咸通進士第

武瓘

九日衛使君筵上作云佳晨登賞喜還鄉謝字開筵晚興長滿眼黃花初
泛酒隔煙紅樹欲迎霜千家門戶笙歌發十里江山白鳥翔共賀安人豐
樂歲幸陪朱履侍銀章

勸酒云勸君金屈卮滿酌不須辭花發多風雨人生足別離感事云花開
蝶滿枝花謝蝶還稀唯有舊巢燕主人貧亦歸

瓘初投卷子知舉蕭倣見是詩賞其有存故之志遂放及第

權登咸通進士第唐末宰益陽

于鄴

孤雲詩云南北各萬里有時心更閒因風離海上伴月到人間洛浦少高樹長安無舊山徘徊不可駐漠漠又東還

蟬詩云江頭一聲起芳歲已難留聽此高枝上遙知故國秋應催風落葉亦勸客回舟不是吟蟬苦年年自有愁

鄴唐末進士也

路德延

德延儋州巖相之猶子數歲嘗賦芭蕉詩曰一種靈苗異天然體性虛葉如斜界紙心似倒抽書詩成翌日傳于都下會儋州坐事誅故德延久不能振光化初方就舉擢第又爲感舊詩曰初騎竹馬詠芭蕉嘗忝名卿誦滿朝五字便容趨絳帳一枝尋許折丹霄豈知流落萍蓬遠不覺推遷歲月遙國境未安身未立至今顏巷守簞瓢天祐中授拾遺會河中節度使

朱有謙領鎮辟掌書記友謙甚禮之然德延浮薄動多忤物友謙解體德
延乃作小兒詩五十韻以刺友謙聞而大怒乃因醉沈之黃河詩曰情態
任天然桃紅兩頰鮮乍行人共看初語客多憐臂膊肥如瓠肌膚軟勝綿
長頭纔覆額分角漸垂肩散誕無塵慮逍遙占地仙排衙朱閣上喝道畫
堂前合調歌楊柳齊聲踏探蓮沿堤行細雨奔巷趁輕煙嫩竹乘爲馬新
蒲折作鞭鸚鵡金鏃繫猫子綵絲牽擁鶴歸青島驅鵝入暖泉楊花爭弄
雪榆葉共收錢錫鏡當胸挂銀珠對目懸頭依蒼鶻裏袖學柘枝揜酒殢
丹砂暖茶催小玉煎頻邀箸箸插時乞繡針穿寶篋拏紅豆妝奩拾翠鈿
戲袍披按褥尖帽戴靴氎展畫趨三聖開屏笑七賢貯懷青杏小垂額綠
荷圓驚滴沾羅淚嬌流污錦涎倦書饒姪姹憎藥巧遷延弄帳燕綃映藏
衾鳳綺纏指敲迎使鼓筋撥賽神絃簾拂魚鈎動箏推雁柱偏碁圖添路
畫笛管欠聲鐫惱客初酣睡驚僧半入禪尋蛛窮屋瓦探雀遍樓椽拋果
忙開口藏鈎亂出拳夜分圍楸枰朝聚打鞦韆折竹裝泥燕添絲放紙鳶

互誇輪水碓相教放風旋旗小裁紅絹書幽截碧牋遠鋪張鵲網低控射
蠅弦詁語時時道謠歌處處傳匿窗眉乍曲遮路臂相連鬪草當春逕爭
毬出晚田柳傍慵獨坐花底困橫眠等鵲前籬畔聽蛩伏砌邊旁枝黏舞
蝶隈樹捉鳴蟬平島誇趨上層崖逞捷緣嫩苔車跡小深雪履痕全競指
雲生岫齊呼月上天蟻窠尋逕斲蜂穴遶塔填樵唱迴深嶺牛歌下遠川
壘柴爲屋木和土作盤筵險砌高臺石危跳峻塔塼忽陞隣舍樹偷上後
池船項橐稱師日甘羅作相年明時方任德勸爾減狂顛

翁承贊

蕭蕭風雨建陽溪溪伴維舟見亞齊一軸新詩劍潭北十年舊識華山西
吟魂惜向江村老空性元知世路迷應笑乘輅青瑣客此時無暇聽猿啼
右承贊詩承贊字文堯閩人唐末爲諫議大夫使福州至劍浦見舊識僧
亞齊贈此章

承贊乾寧進士也

唐語云槐花黃舉人忙承贊有詩云雨中妝點望中黃句引蟬聲送夕陽
憶得當年隨計吏馬蹄日爲君忙

韓垂

垂唐之詩人也題金山云靈山一峯秀岌然殊衆山盤根大江底插影浮
雲閒雷霆嘗閒作風雨時往還象外懸清鏡千載嘗躋攀其詩偶爲庸僧
所毀江南時李鍾山留一絕云不嗟白髮曾遊此不歎征帆無了期盡日
憑欄誰會我只悲不見韓垂詩

鍾山公
建勳也

唐詩紀事卷第六十三

唐詩紀事卷第六十四

顏萱

李穀

司馬都

崔璞

鄭璧

魏朴

張賁

陸龜蒙

皮日休

崔璐

任蕃

盧休

劉畋

顏萱

送羊振文歸覲桂陽云高掛吳帆喜動容問安歸去指湘峯懸魚庭內芝

蘭秀馭鶴門前薛荔封

蘇耽舊宅在桂州

紅旆正憐棠影茂綠衣偏帶桂香濃臨

歧獨有霑襟戀南巷當年共化龍

先輩與拾遺叔父同年

送圓載上人云師來一世恣經行卻泛滄波問去程心靜已能防渴鹿擎

喧時爲駭長鯨

師云舟人遇鯨則鳴鼓

禪林幾結金桃重

日本金桃實重一斤

梵室重修鐵瓦

輕

以鐵爲瓦輕於陶者

料得還鄉無別利只應先見日華生

萱字弘至江南進士也中書舍人蕘之弟嘗受知於張祜故弔祜詩序曰

尚憶孩稚之歲與伯氏常承處士撫抱之仁目管輅爲神童期孔融於偉

器萱唐末與皮陸二生酬唱有詩載松陵集

李穀

和皮日休悼鶴云子才襟期本上清陸雲家鶴伴閒情猶憐反顧五六里
何意復歸十二城露滴誰聞高葉墜月沈休藉半階明人閒華表堪留語
賸向秋風寄一聲又云道林曾放雪翎飛應悔庭除閉羽衣料得王恭披
鶴氅倚吟猶待月中歸

浙東罷府西歸酬別張廣文皮先輩陸秀才詩云豈有頭風筆下痊浪成
蠻語向初筵蘭亭舊趾雖曾見柯笛遺音更不傳照曜文星吳分野留連
花月晉名賢相逢只恨相知晚一曲驪歌又幾年

穀字德師咸通進士也唐末爲浙東觀察推官兼殿中侍御史日休松陵
集序云南陽廣文潤卿隴西侍御德師咸旅泊之際善其所爲皆以詞致
師詞之不多去之速也穀西歸日休贈詩云建安才子太微仙暫上金臺
許二年形影欲歸溫室樹夢魂猶傍越溪蓮空將海月爲京信尙使樵風

送酒船從此受恩知有處免爲傖鬼恨吳天

司馬都

和陸龜蒙白菊詩云恥共金英一例開素芳須待早霜催
遶籬看見成瑤圃汎酒初迷傍玉杯映水好將頻作伴
犯寒疑與雪爲媒夫君每尙風流事應爲徐妃致此裁

鄭璧

和陸龜蒙白菊詩云白豔輕明帶露痕始知佳色重難羣
終朝疑笑梁王

雪盡日慵看

一作魂

蜀帝雲

一作飛

燕雨似翻瑤渚浪雁風疑卷玉綃紋瓊妃

若會寬裁翦堪作蟾宮夜舞裙

璧唐末江南進士也與皮陸二生酬唱又有寒夜文燕潤卿有期不至詩云已知羽駕朝金闕不用燒蘭望玉京應是登仙明月好玉皇留看舞雙成

崔璞

奉酬霜菊見贈詩云菊花開晚過秋風聞道芳香正滿叢爭奈病夫難強
飲應須速自召車公

蒙恩除替將還京洛偶敍所懷云兩載求人瘼三春受代歸務繁多簿籍
才短乏恩威共理乖天獎分憂值歲饑遽蒙交郡印到任十二箇月除替未及三年安敢
整朝衣作牧慙爲政思鄉念式微儻容還故里高臥掩柴扉

璞唐末以大司諫刺蘇州其詩見皮陸二生松陵唱和集

魏朴

和皮日休悼鶴云直欲裁詩問杳冥豈教靈化亦浮生風林月動疑留魄
沙島香愁似蘊情雪骨夜封蒼蘚冷練衣寒在碧塘輕人閒飛去猶堪恨
況是泉臺遠玉京又云經秋宋玉已悲傷况報胎禽昨夜亡霜曉起來無
問處伴僧彈指遶荷塘

朴唐末吳中名士也皮日休松陵詩序云潤卿德師旅泊之際以詞致師

大司諫清河公有作崔璞或命之和亦著焉其餘則吳中名士謂司馬都鄭璧朴與顏萱

張賁

旅泊吳門云一舸吳江晚堪憂病廣文鱸魚誰與伴鷗鳥自成羣反照縱橫水斜空斷續雲異鄉無限思盡付酒醺醺

酬襲美先輩見寄云尋疑天意喪斯文故選茅峯寄白雲酒後只留僧海客香前唯見紫陽君近年已絕詩書癖今日兼將筆硯焚爲有此身猶猶患不知何者是玄纁

和陸龜蒙白菊詩云雪彩冰姿號女華寄身多是地仙家有時南國和霜立幾處東籬伴月斜謝客瓊枝空貯恨袁郎金鈿不成誇自知終古清香在更出梅妝弄晚霞

賁字潤卿南陽人登大中進士第唐末爲廣文博士寓吳中與皮陸二生游其詩多羈旅感激若異鄉無恨思盡付酒醺醺

送李穀西歸云孤雲獨鳥本無依江海重逢故舊稀楊柳漸疏蘆葦白可堪斜日送君歸

陸龜蒙

字魯望父虞賓浙東從事居蘇臺龜蒙攻文與顏蕘皮日休羅隱吳融友善家貧與張搏爲廬江吳興二郡丞李蔚盧攜景重之羅隱寄詩云龍樓李丞相昔歲仰高文黃閣今無主青山竟不焚夜船乘海月秋寺伴江雲只恐塵埃裏浮名點污君唐末以左拾遺授之詔下日以疾終於家

皮日休松陵唱和集序云咸通十年日休爲吳郡部從事有進士陸龜蒙以其業見造其才之變眞天地之炁也近代稱溫飛卿李義山爲之最俾生參之未知孰爲後先

龜蒙三吳人也博雅多文尤善談笑嘗體江謝賦事名振吳下藏書萬餘卷詩篇清麗與皮日休爲友唱和若干卷號曰松陵集中和初遇疾而卒陳給事爲文誌其墓矣吳子華奠文千餘言略曰長風吹海海波淪漣涵爲子文無隅無邊長松倚雪枯枝半折挺爲子文直上嶺絕風下霜晴寒鐘自聲發爲子文鏗鏘杳清武陵深閭川長晝白閒爲子文渺茫岑寂豕

突鯨狂其來莫當雲沈鳥沒其去倏忽膩若凝脂輒於鯨骨霏漠漠澹涓涓春哆冶秋鮮妍觸卽碎潭下月拭不滅玉上煙

江湖散人歌云江湖散人天骨奇短髮搔來蓬半垂手捉孤篁曳寒繭口誦太古滄浪詞詞云太古萬萬古民性甚埜音野無風期夜棲正與禽獸雜

獨自架結縱橫枝因而稱曰有巢氏民共敬貴如君師當時只効烏鵲輩豈是有意陳尊卑無端後聖穿鑿破一派前導千流隨多方惱亂元氣死日使父子生姦欺聖人事業轉消耗尙有漁者存熙熙風波不獨因一士凡百器具皆能施眾疏扈腐鱸鰕脫止失檢馭無讒疵人閒所謂好男子我見婦女留鬚眉奴顏婢膝直乞丐反以正直爲狂癡所以頭欲散不散弁峨巍所以腰欲散不散珮陸離行散任之適坐散從傾欵語散空谷應笑散春容披衣散單複便食散酸鹹宜書散渾真草酒散甘醇醢屋散勢斜直樹散行參差客散忘簪裙禽散空籠池外物一以散中心散何疑不共諸侯分邑不與天子專隍陴靜則守桑柘亂則逃妻兒金鑣紳帶未嘗

識白刃投我窮生爲或聞蕃將負恩澤號令鐵馬如風馳大君年小丞相
少當軸自請都旌旗神鋒悉出羽林仗繪畫日月蟠龍螭太宗基業甚牢
固小醜背叛當殲夷禁軍近自肅宗置一作署抑遏輔國爭雄雌必然大段
翦兇逆須召勁勇持軍麾四方賊壘猶占地死者暴骨生寒饑歸來輒擬
荷鋤立詬吏已責租錢遲興師十萬一日費不翅千金何以支祇今利口
且箕斂何暇挽首哀愴嫠均荒補敗豈無術布在方策撐頹巖冰霜襦袴
易反掌白面諸郎殊不知江湖散人悲古道悠悠幸寄羲皇傲官家未議
活蒼生拜賜江湖散人號

甫里先生傳云少攻歌詩與造物者爭柄遇事輒變化不一其體裁始則
凌轢波濤穿穴險固囚鑱怪異破碎陣敵卒造平澹而後已

龜蒙居震澤之南巨積莊有鬪鴨一欄有驛使過挾彈斃其尤者龜蒙手
一表本云此鴨能人語待附蘇州上進使者斃之奈何使人恐酬以橐中
金候其稍悅方請人語之由曰能呼其名使人憤且笑拂袖上馬復召之

還其金曰吾戲耳龜蒙少高放從張搏遊歷湖蘇二州辟以自佐嘗至饒州三日無所詣刺史蔡率官屬就見之龜蒙不樂拂衣去不喜交流俗不乘馬升舟設蓬席齋束書茶竈筆牀釣具往來時謂江湖散人或號天隨子甫里先生自比涪翁漁父江上丈人

皮日休

日休字襲美襄陽人咸通中爲太常博士遭亂歸吳中黃巢寇江浙劫以從軍至京師以爲僞翰林學士今日休作讖云欲識聖人姓田八二十一欲知聖人名果頭三屈律巢大怒蓋巢頭醜掠鬢不盡疑讖之也遂及禍日休寒日書齋卽事云參佐三閒似草堂恬然無事可成忙移時寂歷燒松子盡日殷勤拂乳牀將近道齋先衣褐欲清詩思更焚香空庭好待中宵月獨禮星辰學步罡又云不知何事有生涯皮褐親裁學道家深夜數甌惟柏葉清晨一器是雲華盆池有鷺窺萍沫石版無人掃桂花江漢欲歸應未得夜來頻夢赤城霞又云方朔家貧未有車肯從榮利捨樵漁從

公未怪多侵酒見客惟愁轉借書暫聽松風生意足偶看溪月世情疎如

鉤得貴非吾事合向煙波爲五魚

松江有五魚

日休賦龜詩嘲歸氏子曰硬骨殘形知幾秋屍骸終是不風流頑皮死後鑽須徧都爲平生不出頭歸氏子以姓嘲日休云八片尖斜砌作裘火中燂了水中揉一包閒氣如常在惹踢招拳卒未休

北夢瑣言云日休傲誕自號閒炆布衣日休之子光業辭學宏贍唐末爲越州副使

松陵集序曰詩有六義其一曰比比者定物之情狀也則必謂之才才之備者於聖爲六藝在賢爲聲詩噫春秋之後頌聲亡寢降及漢氏詩道薦作然二雅之風委而不興矣在詩有三言四言五言六言七言之作三言者曰振振鷺鷺于飛是已五言者曰誰謂雀無角何以穿我屋是也六言者我姑酌彼金罍是也七言者交交黃鳥止于桑是也九言者曰澗酌彼行潦挹彼注茲是也蓋古詩率以四言爲本而漢氏方以五言七言爲之

也其句亦出於周詩五言者李陵曰攜手上河梁是也七言者漢武曰日月星辰和四時是也爾後盛於建安以降江左君臣得其浮豔然詩之六義微矣逮及吾唐開元之世易其體爲律焉始切於儷偶拘於聲勢然詩云觀憫旣多受侮不少其對也工矣堯典曰聲依永律和聲其爲律也甚矣由漢及唐詩之道盡矣吾又不知千祀之後詩之道止于斯而已卽後有變而作者不得以知之夫才之備者猶天地之烝乎烝者止乎一也分而爲四時其爲春則煦枯發枿如弃如獲百物融洽酣人肌骨其爲夏則赫曦朝升天地如窯草焦木暍若燎毛髮其爲秋則涼颺高警若露天骨景爽夕清神不蔽形其爲冬則霜陣一淒萬物皆瘁雲沮日慘若憚天責夫如是豈拘于一哉亦變之而已人之有才者不變則已苟變之豈異于是乎故才之用也廣之爲滄溟細之爲溝竇高之爲山嶽碎之爲瓦礫美之爲西子惡之爲敦洽壯之爲武賁弱之爲處女大則八荒之外不可窮小則一毫之末不可見苟其才如是復能善用之則庖丁之牛扁之輪郢

之斤不足謂其神解也噫古之士窮達必形于歌詠苟欲見乎志非文不能宣也于是爲其詞詞之作固不能獨善必須人以成之昔周公以遺成王吉甫作頌以贈申伯詩之酬贈其來尙矣後每爲詩必多闕二爲闕一字咸通七年今兵部令狐員外在淮南今中書舍人闕字公守毘陵日休皆以詞獲幸悉蒙以所製命之和各闕二軸亦有名其守者十年大司諫出牧于吳日休爲部從事居一月有進士陸龜蒙字魯望者以其業見造凡數編其才之變真天地之炁也近代稱溫飛卿李義山爲之最俾生參之未知其孰爲之後先也

雜體詩序云案舜典常曰夔命汝典樂教胄子詩言志歌永言在周禮太師之職掌教六詩諷賦既興風雅互作雜體遂生焉後係之於樂府蓋典樂之職也在漢代李延年爲協律造新聲雅道雖缺樂府乃盛饒歌鼓吹拂舞予俞因斯而興詞之體不得不因時而易也古樂書論之甚詳今不能備載載其他見者漢武元封三年作柏梁臺詔羣臣二千石有能爲七

言詩者乃得上坐帝曰日月星辰和四時梁王曰驂駕駟馬從梁來由是
聯句興焉孔融詩曰漁父屈節水潛匿方作郡姓名離合也由是離合興
焉晉傅咸有迴文反復詩二首云反覆其文者以示憂心展轉也悠悠遠
邁獨煢煢是也由是反覆興焉晉溫嶠有迴文虛言詩云寧神靜泊損有
崇亡由是迴文興焉梁武帝云後牖有朽柳沈約云偏眠船舷邊由是疊
韻興焉詩云蟬竦在東又曰鴛鴦在梁由是雙聲興焉詩云惟南有箕不
可以簸揚惟北有斗不可以挹酒漿近乎戲也古詩或爲之蓋風俗之言
也古有採詩官命之曰風人圍棊燒敗襖看子故依然由是風人之作興
焉梁書云昭明善賦短韻吳均善壓強韻今亦効而爲之存于編中陸生
與予各有是爲凡八十六首如四聲詩三字離合全篇雙聲疊韻之作悉
陸生所爲又足見其多能也案齊竟陵王郡縣詩曰追芳承荔浦揖道信
雲邱縣名由是興焉案梁元藥名詩曰戍客恆山下當思衣錦歸藥名由
是興焉陸與予亦有是作至如鮑昭之建除沈炯之六甲十二屬梁簡文

之卦名陸惠曉之百姓梁元帝之鳥名龜兆蔡黃門之口字古詩兩頭纖
纖藁砧五雜俎已降非不能也皆鄙而不爲噫由古至律由律至雜詩詩
之道盡乎此也近代作雜體唯劉賓客集中有迴文離合雙聲疊韻如聯
句則莫若孟東野與韓文公之多他集罕見足知爲之之難也

日休疊韻山中吟云穿煙泉潺湲觸竹犢殼棘荒篁香墻匡熟鹿伏屋曲
雙聲溪上思云疎杉低通灘冷鷺立亂浪草彩欲夷猶雲容空澹蕩

晚秋吟

以題中三字韻合

東皋煙雨歸耕日免去黃冠首刈禾火滿酒壚詩在口

今人無計奈儂何

藥名離合夏日卽事云季春人病拋芳杜仲夏溪波遶壞垣衣典濁醪身
倚桂心中無事到雲昏

懷鹿門縣名離合云山瘦更培秋後桂溪澄閒數晚來魚臺前過雁盈千
百泉石無情不寄書

寒日古人名云北顧懽遊悲沈宋

梁武改爲北顧

南徐陵寢歎齊梁水邊韶景無

窮柳寒被江淹一半黃

風人詩云江上秋聲起從來浪得名逆風猶掛席苦不會帆情
陸龜蒙詩云十萬合師出遙知至憶君一心如瑞表唯作兩歧分

崔璐

璐有覽皮先輩盛製詩贈日休云河嶽挺靈異星辰精氣殊在人爲英傑
與國作禎符襄陽得奇士俊邁真龍駒勇果魯仲由文賦蜀相如渾浩江
海廣葩華桃李敷小言入無閒大言塞空虛幾人遊赤水夫子得玄珠鬼
神爭奧祕天地惜洪鑪既比曾參行仍兼君子儒吾知上帝意將使居黃
樞好保千金體須爲萬姓謨日休和云伊余幼且賤所稟自以殊弱歲謬
知道有心陳皇符豈意海上雁運跼軒下駒從性作古文所爲皆自如但
恐才格劣敢誇詞彩敷句句考事實篇篇窮玄虛誰能變羊質竟不獲驪
珠粵有造化手曾聞天地鑪文章鄴下秀氣貌淹中儒展我此志業期君
持中樞蒼生眼穿望勿作磻溪謨

璐登咸通七年進士第

任蕃

宮怨云淚乾紅落臉心盡白垂頭自此方知怨從來豈信愁蕃又有無語
與春別細看枝上紅之句張爲取作主客圖

盧休

春寒酒力遲冉冉生微紅

寒月聯句

自然草木性誰祝元化功

句

湓浦風生破

膽愁

句

血染劍花明帳幕三千車馬出漁陽

句

右張爲取作主客圖

劉畋

畋有晚泊漢江渡詩云末秋雲木輕蓮折晚香清雨下侵苔色雲涼出浪
聲疊帆依岸盡微照夾堤明渡吏已頭白遙知客姓名又有雨後句云殘
陽來霽岫獨興起滄洲張爲取作主客圖

唐詩紀事卷第六十五

袁郊

盧延讓

裴說裴諧

張爲

韓偓

曹松

杜荀鶴

孫棨

王鐸

鄭綰

胡玢

楊收

平曾

繆島雲

袁郊

月詩云嫦娥竊藥出人閒藏在蟾宮不放還后羿徧尋無覓處誰知天上

卻容姦

霜詩云古今何事不思量盡信鄒生感彼蒼但想燕山吹暖律炎天豈不

解飛霜

露詩云湛湛騰空下碧霄地卑溼處更偏饒菅茅豐草皆沾潤不道良田

有旱苗

雲詩云楚甸嘗聞旱魃侵從龍應合解爲霖荒淫卻入陽臺夢惑亂懷襄

父子心

郊咸通時爲祠部郎中有甘澤謠九章與溫庭筠酬唱庭筠有開成五年抱疾不得預計偕詩寄郊云逸足皆先路窮交獨向隅是也

郊字之儀滋之子也昭宗時爲翰林院學士

盧延讓

延讓吟詩多著尋嘗容易語如送周太保赴浙西云臂鷹健卒懸氈帽騎馬佳人卷畫衫又寄友人云每過私第邀看鶴長著公裳送上驢然于數篇見境尤妙有松寺云山寺取涼當夏夜共僧蹲坐石堦前兩三條電欲爲雨七八個星猶在天衣汗稍停牀上扇茶香時潑澗中泉通宵聽論蓮華義不藉松牕一覺眠又苦吟云莫話詩中事詩中難更無吟安一個字然斷數莖鬚險覓天應悶狂搜海亦枯不同文賦易爲著者之乎又贈僧云浮世浮華一斷空偶拋煩惱到蓮宮高僧解語牙無水老鶴能飛骨有風野色吟餘生竹外山陰坐久入池中禪師莫問求名苦滋味過於食蓼蟲曾獻王建詩云栗爆燒氈破猫跳觸鼎翻後建冬夜與潘峭平章邊事

旋令宮人燒栗俄有數栗爆出燒繡褥時建多疑常于爐中燒金鼎命二妃親侍湯茶而已是夜宮猫相戲悞觸鼎翻建良久曰栗爆燒氈破猫跳觸鼎翻憶得盧延讓卷有此一聯乃知先輩裁詩信無虛境來日遂有六行之拜

自給事中拜工部

翰林學士吳融獨重其作盛稱于時且云此子語不尋

常後必垂名楊大年云延讓詩至今存人亦有絕好之者其播人口有旅舍言懷云名紙毛生五門下家僮骨立六街中蜀路云雲閒鬧鐸驟至雪裏殘骸虎曳來懷江上云餓猫臨鼠穴饑犬舐魚砧八月十六日夜云只訛些子緣應耗沒多光寄人云吟安一個字撚斷數莖鬚冬夜云樹上謔諷批頰烏窗閒壁駮叩頭蟲哭人云漸窮頑僕慵看馬著慘佳人暗理箏狐衝官道過犬刺店門開大租張相每稱之餓猫臨鼠穴饑犬舐魚砧成中令每稱之栗爆猫跳之句王建愛之盧曰平生投謁公卿不意得猫狗力延讓始投贄吳子華子華讀至不同文賦易爲下者之乎笑曰上門惡罵來

本朝楊億在翰林苑嘗召對上言及延讓詩曰臂鷹健卒懸氈帽騎馬佳人卷畫衫似此淺近亦自成一體

延讓字子善范陽人光化初登第從事朗陵雷滿敗歸王建僭位授水部外郎卒于刑部侍郎師薛能爲文

裴說 裴諧

唐舉子先投所業於公卿之門謂之行卷說只行五言十九首至來年秋賦復行舊卷人有譏之者說曰只此十九首苦吟尙未有人見知何暇別行卷哉識者以爲知言說天復六年登甲科其詩以苦吟難得爲工但拘格律嘗有詩曰苦吟僧入定得句將成功又贈僧貫休云總無方是法難得始爲詩又云是事精皆易唯詩會卻難遭亂故宦不達多遊江湖閒有石首縣詩云因攜一家住贏得半年吟深閨乍冷開香篋玉筍微微溼紅頰一陣霜風殺柳條濃煙半夜成黃葉重重白練明如雪獨下閒堦轉淒切祇知抱杵搗秋砧不覺高樓已無月時聞寒雁聲相喚紗窗只有燈相

伴幾展齊紈又懶裁離腸恐逐金刀斷細想儀形執牙尺回刀翦破澄江
色愁捻銀鍼信手縫惆悵無人試寬窄時時舉袖勻紅淚紅牋謾有千千
字書中不盡心中事一半慙慙寄邊使此說聞砧詩也說終禮部員外郎
說與諧俱有詩名諧唐天祐二年登第終于桂嶺假官宰字而已同在湘
江說詩云吟餘潮落岸冰高經杜甫墳云擬掘孤墳破重教大雅生諧詩
云名終埋不得骨在朽何妨景同而語意俱別寔爲雙美說旅行聞寇云
寸步邊多事將行問四鄰深山不畏虎當路卻妨人無事助明代何門鎖
此身空慙兩行淚飄灑向紅塵

洛中作云莫怪苦吟遲詩成鬢亦絲鬢絲猶可染詩病卻難醫山暝雲橫
處星沈月側時冥搜不堪得一句至公知

中秋月云一歲幾盈虧當軒重此期幸無偏照處剛有不明時色靜雲歸
早光凝故宿遲望吟吟未足皎皎下疎籬

棊云十九條平路言平又嶮巖人心無算處國手有輸時勢迴流星遠聲

乾下雹遲臨軒纔一局寒日又西垂

喜友人再面云一別幾寒暄迢迢隔塞垣相思長有事及見卻無言靜坐將茶試閒書把葉翻依依有留意圓月上東軒

張爲

秋醉歌云金風颯颯起還是招魚翁攜酒天姥岑自彈嶧陽桐脫卻登山履赤腳翹青筇泉聲掃殘暑猿臂攀長松翠微泛罇綠苔蘚分煙紅造化處術內相對數壺空醉眠嶺上草不覺夜露濃一夢到天曉始覺一醉中皎然夢中路直到瀛洲東初平把我臂相與騎白龍三留對上帝玉樓十二重上帝賜我酒送我金敲鐘寶閣香斂苒琪樹寒玲瓏動葉如笙篁音律相怡融珍重此一醉百骸出天地長如此夢魂永謝名與利

爲唐末江南詩人與周朴齊名如到處卽閉戶逢君方展眉最有詩稱爲作詩人主客圖序曰若主人門下處其客者以法度一則也以白居易爲廣大教化主上入室楊乘入室張祐羊士諤元稹升堂盧仝顧況沈亞

之及門費冠卿皇甫松殷堯藩施肩吾周元範祝元膺徐凝朱可名陳標
童翰卿以孟雲卿爲高古奧逸主上入室韋應物入室李賀杜牧李餘劉
猛李涉胡幽貞升堂李觀賈馳李宣古曹鄴劉駕孟遲及門陳潤韋楚老
以李益爲清奇雅正主上入室蘇郁入室劉畋僧清塞盧休于鵠楊洵美
張籍楊巨源楊敬之僧無可姚合升堂方干馬戴任蕃賈島厲元項斯薛
壽及門僧良又潘誠于武陵詹雄衛準僧志定喻覺朱慶餘以孟郊爲清
奇僻苦主上入室陳陶周朴及門劉得仁李溟以鮑溶爲博解宏拔主上
入室李羣玉入室司馬退之張爲以武元衡爲瓌奇美麗主上入室劉禹
錫入室趙嘏長孫佐輔曹唐升堂盧頻陳羽許渾張蕭遠及門張陵章孝
標雍陶周祚袁不約

杜光庭載毛仙翁事云仙翁名于字鴻漸元和閒劉禹錫李紳白樂天輩
皆贈詩至大中戊寅五十餘年矣是歲張爲薄遊長沙不汲汲隨計獲女
奴于嶽麓下惑之歲餘成羸疾仙翁一見曰子妖氣邪光浹遍肌骨苟不

相植殞于旦夕也。以一粒授爲于香鑪焚之，郁烈之氣聞百步。魅妾一號而斃，乃木偶人也。又吞以丹砂如黍者三疾，遂瘳。爲作詩別之曰：羸形感神藥，削骨生豐肌。蘭炷飄靈煙，妖怪立誅夷。重覩日月光，何報父母慈。黃河濁，袞袞別淚流。淅淅黃河清，有時別淚無。收期爲後入，釣臺山訪道而去。

韓偓

偓父瞻開成六年李義山同年也。義山有餞韓同年西迎家室戲贈云：籍征西萬戶，侯新綠貴壻。起珠樓一名我慢居，先甲千騎君。翻在上頭雲路，招邀回綵鳳。天河迢遞笑牽牛，南朝禁鬪無人寄。瘦盡瓊枝爲四愁。偓小字冬郎，義山云嘗卽席爲詩相送。一座皆驚，句有老成之風。因有詩云：十歲裁詩走馬成，冷灰殘燭動離情。桐花萬里丹山路，鷓鴣清于老鳳聲。偓字致堯，今日致光誤矣。自號玉山樵人。

苑中云上苑離宮處處迷，相風高與露盤齊。金階鑄出狻猊立，玉柱雕成

翡翠啼外使調鷹初得按五方外按使以鷹隼初調中官過馬不教嘶上乘

馬必中官馭以進謂之過馬笙歌錦繡雲霄裏獨許詞臣醉似泥

六月十七日召對詩云清暑簾開散異香恩深咫尺對龍章花應洞裏尋

常發日向壺中特地長坐久忽疑槎犯斗歸來兼恐海生桑如今冷笑東

方朔唯用詼諧侍漢皇

與吳子華侍郎同年玉堂伴直懷昔敘懇因成長句兼呈同年云往年鶯

谷接清塵今日鼇山作侍臣二紀計偕勞筆硯一朝宣入掌絲綸子與子華俱久

困名聲名烜赫文章士金紫雍容富貴春絳帳恩深無路報語餘相顧卻

酸辛

錫宴日詩云玉銜花馬踏天街詔遣追歡綺席開中使押從天上去外人

知自日邊來是日在外四學士排門齊入同進狀臣心淨比漪漣水聖澤

深於斂灩杯才有異恩頒稷卨已將優禮及鄒枚清商迴向梨園降妙妓

新行峽雨迴不敢通宵離禁直晚乘殘醉入銀臺當直學士二人至晚學士院使二人卻押入直

餘四人在外可以卜夜內臣去外知熟開丞
郎給舍多來突宴余是日當直故有是句

醉著云萬里清江萬里天一村桑柘一村煙漁翁醉著無人喚過午醒來
雪滿船

卽日云書牆暗記移花日洗甕先知醞酒期須信閒人有忙事早來衝雨
覓漁師

春恨云殘夢依依酒力餘城頭鶉鴂伴啼鳥平明乍捲西樓幕院靜初聞
放轆轤

并州云成旗青草接榆關雨裏并州四月寒誰會憑欄潛忍淚不勝天際
似江干

偃天復初入翰林其年冬駕幸鳳翔偃有扈從之功返正初上面許偃爲
相奏云陛下運契中興當復用重德鎮風俗臣坐主右僕射趙崇可充是
選乞迴臣之命授崇天下幸甚上嘉歎翌日制用崇暨兵部侍郎王贊爲
相時梁太祖在京素聞崇之輕佻贊復有鬻馳入請見于上前具言二公

長短上曰趙崇是偃所薦時偃在側梁主叱之偃奏曰臣不敢與大臣爭
上曰韓偃出尋謫官入閩故偃有詩曰手風慵展八行書眼暗休看九局
圖窗外日光飛野馬案前筠管長蒲蘆謀身拙爲安蛇足報國危曾捋虎
鬚滿世可能無默識未知誰擬試齊竽

香奩集和魯公之詞也惟其豔麗故貴後嫁其名於偃凝平生著述分爲
續綸遊藝孝悌疑獄香奩籛金六集自爲遊藝集序云予有香奩籛金集
不行于世凝在政府避議論諱其名又欲後人知之故遊藝集序實之此
凝之意也

沈存中夢
溪筆談

曹松

天復初杜德祥主文放松及王希羽劉象柯崇鄭希顏等及第年皆七十
餘時號五老勝時內難新平首求孤貧人德祥以松等塞詔各授校書郎
制曰念爾登科之際當予反正之年宜降異恩各膺寵命

松字夢徵舒州人也學賈司倉爲詩此外無他能時號松啓事爲送羊腳

狀

松別湖上主人云門繫釣舟雲滿岸借君幽致坐移旬湖村夜叫白蕪鴈
菱市曉喧深浦人遠水日邊重作雪寒林燒後別生春不辭更後醒還醉
太一東峯歸夢頻

李肇國史補云曲江大會此爲下第舉人邇來漸侈靡皆爲上列所占向
之下第舉人不復預矣所以逼大會則先牒教坊請奏上御紫雲樓垂簾
觀焉時或擬作樂則爲之移日故曹松詩云追遊若遇三清樂行從應妨
一日春勅下後人置皮袋例以圖章酒器錢絹實其中逢花卽飲故張籍
詩云無人不借花園飲到處皆攜酒器行其皮袋狀元錄事同檢點闕一
則罰金曲江之宴行市羅列闐闐爲之半空公卿家率以是日揀選東牀
車馬闐塞莫可殫述

松及第勅下宴中獻坐主杜侍郎詩云得召邱牆淚卻頻若無公道也無
因門前送勅朱衣吏席上銜盃碧落人半夜笙歌教洗月平明桃杏放燒

春南山雖有歸溪路爭那酬恩未殺身

春日長安書事云浩浩看花晨六街揚遠塵塵中一丈日誰是晏眠人御柳舞著水野鶯啼破春徒云還楚客猶自惜離秦

晨起云曉色教不睡捲簾清炷中林殘數枝月髮冷一梳風並鳥聞鐘語欹荷隔霧空莫徒營白日道路本無窮

弔北邙云山下望山上夕陽明又曛無人醫白髮少地著新墳歲代殊相遠賢愚旋不分東歸聊一弔亂木倚寒雲

松有詩云憑君莫話封侯事一將功成萬骨枯可謂諳世故矣

杜荀鶴

荀鶴有詩名號九華山人大順初擢第授翰林學士主客外郎知制誥序其文爲唐風集或曰荀鶴牧之微子也牧之會昌末自齊安移守秋浦時年四十四所謂使君四十四兩佩左銅魚者也時妾有姪出嫁長林鄉正杜筠而生荀鶴擢第年四十六矣

溪興云山雨溪風卷釣絲瓦甌篷底獨斟時醉來睡著無人喚流下前溪
也不知

春宮怨云早被嬋娟誤欲妝臨鏡慵承恩不在貌教妾若爲容風暖鳥聲
碎日高花影重年年越溪女相憶採芙蓉

荀鶴曾得詩一聯云舊衣灰絮絮新酒竹芻芻章莊曰我道印將金鎖鎖
簾用玉鈎鈎卽京兆大拜之祥也

贈僧云利門名路兩何憑百歲風前短燄燈只恐爲僧心不了爲僧心了
總輸僧

時世行云夫因兵死守蓬茅麻紵裙衫鬢髮焦桑柘廢來猶納稅田園荒
盡尙徵苗時挑野菜和根煮旋斫生柴帶葉燒任是深山更深處也應無
計避徵徭又云八十老翁住破村村中牢落不堪論因供塞木無桑柘爲
點鄉兵絕子孫還似平寧徵賦稅未曾州縣略安存至今雞犬皆星散日
落西山哭倚門

荀鶴擢第時危勢晏復還舊山田頴在宣州甚重之頴起兵陰令以牋問至梁太祖許頗厚遇及頴遇禍梁祖表授翰林學士主客員外郎知制誥恃勢侮易搢紳衆欲殺之而未及天祐初卒

顧雲序其詩曰大順初皇帝小宗伯河東裴公掌邦貢次二年遠者來隱

者出異人雋士大集都下于羣進士中得九華山人杜荀鶴拔居上第諸

生謝恩日列坐既定公揖生謂曰聖上歎文教不張思得如高宗朝射洪

拾遺陳公名犯文宗廟諱作詩出沒二雅馳驟建安削苦澀僻碎略淫靡淺切破

豔冶之堅陣擒雕巧之酋帥皆摧幢折角崩潰解散掃蕩詞場豁清文祿

然後有戴容州劉隨州王江寧率其徒揚鞭按轡相與呵樂來朝于正道

矣以生詩有陳體可以潤國風廣王澤故擢以塞詔竟勉爲中興詩宗生

謝而退明年寧親江表以僕故山偕隱者出詩三百篇見其雅麗激越之

句能使貪吏廉邪臣正父慈子孝兄友弟悌人倫之紀備矣其壯語大言

則決起逸發可以左攬工部袂右拍翰林肩吞賈喻八九于胷中曾不董

唐詩紀事卷第六十五八無錫丁氏校刊

介情動于中則極思冥搜神遊希夷形兀枯木五聲勞于呼吸萬象貧于
抉別信詩之雄傑者也美哉裴公之知人爲不誣矣於戲旌別淑慝史臣
之職僕幸得爲之敘錄視其人齒尙壯才力尙未盡謳吟之興方酣俟其
繼作得如周頌者目之爲唐風集荀鶴于謁梁王朱全忠兩作而天無行
雲梁曰此謂天泣知何祥先作無雲詩乃賦曰同是乾坤事不同雨絲飛
灑日輪中若教陰翳都相似爭表梁王造化功梁悅之

孫榮

題妓王福娘牆詩云移壁迴窗費幾朝指環偷解博蘭椒無端鬪草輸鄰
女更被拈將玉步搖

鄭谷寄臺院孫端公榮詩云才屈道仍孤無何拾鈞徒班雖沾玉笋香不
近金爐雨露瞻雙闕煙波隔五湖唯君應是念曾共伏青蒲

曾同
諫垣

榮贈妓人云綵翠仙衣紅玉膚輕盈年在破瓜初霞盃醉喚劉郎賭雲鬢
慵邀阿母梳不怕寒侵緣帶寶每憂風舉倩持裾謾圖西子爲妝樣西子

元來未得如

題北里妓人壁云寒繡衣裳餉阿嬌新團香獸不禁燒東鄰起樣裙腰闊
剩蹙黃金一兩條

王鐸

鐸字昭範重德名家位望崇顯率由文雅非定亂才鎮渚宮爲都統以禦
巢寇泊荊州失守復把潼關黃巢差人傳語云令公儒生非我敵請自退
避無污鋒刃于是棄關隨僖宗播遷于蜀再授都統收復京師大勳不成
竟落都統後有詩其要云黜詔已聞來闕下檄書猶去偏軍前亦志其事
也

罷都統守鎮滑州作云用軍何事敢遷延恩重才輕分使然腰閒書解蘇
秦印波上虛迎范蠡船正會星辰扶北極卻驅戈甲鎮南燕三塵上相逢
明主九合諸侯媿昔賢看卻中興扶大業殺身無路好歸田

鐸爲侍御史于興宗守絳州登越王樓以詩寄朝士鐸和云謝眺題詩處

危樓壓郡城雨餘江水碧雲斷雪山明錦繡來仙境風雲入帝京恨無青玉案何以報高情

鐸謁梓潼張惡子廟詩曰盛唐聖主解青萍欲振新封濟順名夜雨龍拋三尺匣青雲鳳入九重城

時僖宗幸蜀人情術士皆云春內必還京

劍門喜氣隨雷動玉壘韶

光待賊平惟報關東諸將相柱天功業賴陰兵

判度支蕭遇和云青骨祀吳誰讓德紫華居越亦知名未聞一劍傳唐主長擁千山護蜀城斬馬威稜掃蕩截蛟鋒刃俟昇平鄧侯爲國親簫鼓堂上神籌更布兵

時僖宗解劍贈神故二公賦詩

鄭紫

古今詩話云相國紫善詩有題老僧詩云日照四山雪老僧門未開凍瓶黏柱礎宿火燼爐灰童子病歸去鹿麕寒入來常云此詩屬對可以衡秤言輕重不偏也或曰相國近爲新詩否對曰詩思在灞橋風雪中驢子上此處何以得之蓋言平生苦心也

縈字蘊武大順後王政微縈每以詩謠託諷中人有誦之天子前者昭宗意其所蘊未盡因有司上班簿遂書其側曰禮部侍郎同中書門下平章事縈本善詩其語俳諧故使落調世號鄭五歇後體至是省吏赴其家上謁縈笑曰諸君誤矣人皆不識字宰相亦不及我俄聞制下歎曰歇後鄭五作宰相事可知矣立朝無復故態纔三月去位

縈刺廬江將去別郡人云唯有兩行公廨淚一時灑向渡頭風其滑稽類此

胡玠

玠不知何許人嘗隱廬山苦心于五七言桑落洲一篇云莫問桑田事但看桑落州數家新住處昔日大江流古岸崩欲盡平沙長未休想應百年後人世更悠邐又曰輪中別有物改云桂根寧有土光外更無空李騰廉問江西弓旌不至

楊收

字藏之吳人呼爲神童兄發戲令詠蛙卽曰兔邊分玉樹龍底耀同儀會
當同鼓吹不復問官私

又令詠筆仍賦鑽字卽曰雖非囊中物何堅不可鑽一朝操政事定冠使
三端

吳人造門請詩觀者壓敗其牆收嘲曰爾幸無羸角何用觸吾藩若是升
堂者還應自得門

平曾

曾謁華州李固言不遇因吟一絕而去曰老夫三日門前立珠箔銀屏晝
不開詩卷卻拋書袋裏正如閒看華山來

曾恃才傲物竟歿於縣曹薛平僕射出鎮浙西主禮稍薄曾留詩以諷之
曰梯山航海幾崎嶇來謁金陵薛大夫毛髮豎時趨劍戟衣冠儼處拜冰
壺誠知兩軸非珠玉深媿三縑郵旅途明日過江風景好不堪迴首望句
吳薛聞曾出境遣使追還縻留數日又獻縶白馬詩曰白馬披鬃練一團

今朝被絆欲行難雪中放去空留跡月下牽來只見鞍向北長鳴天外遠
臨風斜控耳邊寒自知毛骨還應異更請孫陽子細看河東公曰若不留
絆行軒那得觀其毛骨以殊禮相待

唐以府元被黜者九人曾其一也曾長慶二年同賈闋仙輩貶謂之舉場
十惡曾後謁固于蜀幕中皆名士曾輕忽無所畏遂獻雪山賦李覽命推
出不旬日再獻鰈魚賦曰此魚觸物而怒翻身上波爲烏鳶所獲奈魴鯉
笑之何李覽之遂不至深罪

繆島雲

島雲少從浮圖其詩尤尙奇險至如四五片雲生絕壁兩三行雁過疏松
又拋芥子降顛拂折楊枝灑醉惺惺

廬山瀑布曰白鳥遠行樹玉虹孤飲潭皆隻出前輩開成中常遊豫章武
宗朝准勅反初名甚喧然

唐詩紀事卷第六十五

...

...

...

...

...

...

...

...

...

...

...

...

...

...

...

唐詩紀事卷第六十五

唐詩紀事卷第六十六

馮涓

盧嗣立

李質

姚巖傑

王璘

嚴郭

陳標

崔安潛

盧發

錢珣

盧駢

嚴暉

王渙附妻贊

張曙

翁綬

戴司顏

孫定

趙牧

盧注

鄭愚

王鐔

陳琬

馮涓

涓初除京兆府參軍恩地杜相審權有江西之拜制未出召涓密語延辟之命戒勿泄涓漏其言于友人鄭寬寬尋捧刺詣賀杜遂鄙涓淺薄不預初選及廉車發日涓候別于長樂杜長揖曰勉旃後分符眉州不得之任在西川重圍中跼踖于陳田之間羈愁六年徒步糊口著懷秦賦有南冠龍吟等集皆傷踳蹬也集有蜀馱引其要云昂藏大步蠶叢國曲頸微伸高九尺卓女窺窗莫我知嚴仙據按何曾識又題支機石云不隨俗物皆

成土只待明時卻補天惜知己之不遇也

涓字信之信都人大中初舉進士登宏詞科時危隱商山十年昭宗以爲眉州刺史陳田拒命涓棄郡于成都墨池灌園自給王建以爲翰林學士雖談諧傲物而多有補益卒于蜀

盧嗣立

望九華山云九華深翠落軒楹迴眺澄江氣象明不遇陰霾孤岫隱正當寒日衆峯呈坐觀松雪銷煩思惜別煙嵐駐曉行得路歸山期早訣夜來潛已告精誠

嗣立登會昌進士第

李質

質字公幹襄陽人應舉無成有親在衡湘往謁焉泝流至湓城豫章逐帥捨舟由武寧而反會草寇殺其宰倉皇前去得日觀宿東房有酒數缸甚美遂攜一壺上樓酌之因吟曰曾入桃溪路仙原信少雙洞霞飄素練蘚

壁畫陰窗古木愁撐月危峯欲墮江自吟空向寂誰共倒秋缸吟畢如有
人言曰土主尙書寓宿在此

質登第後二十年廉察豫章時大中十二年也出科名分定錄

姚巖傑

巖傑梁國公元崇裔孫嘗以詩酒放遊江左乾符中顏標典藩鞠場亭宇
初胤命巖傑紀其事文成粲然標欲刊去一二字巖傑大怒標遂仆其碑
巖傑以一篇紀之曰爲報顏公識我麼我心唯只與天和眼前俗物關情
少醉後青山入意多田子莫嫌彈鋏恨甯生休唱飯牛歌聖朝著爲蒼生
計也合公車到薜蘿

盧肇牧歙州巖傑在婺源先以著述寄肇肇已知其人辭以兵火之後郡
中凋弊無以迎逢大賢巖傑復以長牋激之肇不得已輟所乘馬迎至郡
齋館穀如公卿禮旣而日肆傲睨肇嘗以篇詠詫于巖傑曰明月照巴山
巖傑笑曰明月照天下奈何獨巴耶子發漸不得意無何會于江亭時蒯

希逸在席肇改令曰目前取一聯象令主曰遠望漁舟不闊尺八巖傑遽
飲酒一器凭欄嘔噦須臾卽席還令曰凭欄一吐已覺空喉有集二十卷
目曰象溪子中和末豫章大亂巖傑病死

王璘

長沙日試萬言王璘詞學富瞻崔詹事廉問表薦于朝先試之使解璘請
十書吏皆給筆札璘口授十吏筆不停綴首題黃河賦三千字復爲鳥散
餘花落詩二十首援筆而就時忽風雨暴至數幅爲回飆所卷泥滓沾漬
璘曰勿取但將紙來復縱筆一揮斯須復十餘篇矣時未亭午已七千餘
言時路巖方當鈞軸遣一介召之璘曰請俟見帝巖大怒亟命奏廢萬言
科璘杖策而歸放曠盃酒閒雖屠沽無閒然矣璘與李羣玉相遇獄麓寺
羣玉曰公何許人璘曰日試萬言王璘羣玉待之甚淺曰請與公聯句可
乎璘曰唯子之命羣玉破題而授之不記其詞璘略不佇思繼之曰芍藥花開
菩薩面櫻欄葉散野人頭羣玉遂屈崔詹事遺璘夾纈數匹璘翌日以作

中單褕襜衣之

嚴郭

賦百舌鳥云此禽輕巧少同倫我聽長疑舌滿身星未沒河先報曉柳猶黏雪便迎春頻嫌海燕巢難定卻訝林鶯語不真莫倚清風更多事玉樓還有晏眠人

陳標

標贈元和十三年登第進士曰春官南院粉牆東地色初分月色紅文字一千重馬擁喜歡三十二人同眼看魚變辭凡水心逐鷺飛出瑞風莫怪雲泥從此別總曾惆悵去年中

標詠蜀葵花云能共牡丹爭幾許得人嫌處是花多韋絢曰鶴與鷓茲皆胎化而人以鶴爲仙禽蓋鶴難見鷓茲易見貴耳而賤目也遂誦標蜀葵花詩以況之

啄木謠云丁丁向晚急還稀啄徧庭槐未肯歸終日與君除蠹害莫嫌無

事不平飛

寄友人云杜甫在時貪入蜀孟郊生處卻歸秦如今始會麻姑意借問山川與後人右張爲取作主客圖

標終侍御史長慶二年進士也

崔安潛

河澤韶陽曲江人也父鼎容管經略有文稱澤乾寧中隨計至三峯行在永樂崔公安潛卽澤之同年文人也聞澤來乃以一絕贈之曰四十九年前及第同年唯有老夫存今日殷勤訪吾子隱將鬻蠶上龍門時主文與奪未分又會相庭有所阻

時崔相公徹特權即永樂猶子也

因之敗于垂成後漂泊關外

梁太祖受禪澤假廣南幕職入貢勅賜及第

世謂崔魏公鉉好食新餽頭杜幽公悰每早食饋飯乾脯崔侍中安潛好看鬪牛李衛公曰吾喜見未聞新書策

安潛字進之累爲西川平盧等節度拜侍中自中令鎮荆南

盧發

杜蘊廉問長沙發爲從事往致聘焉發酒酣傲睨公公因改著詞令曰十
姓胡中第六胡也曾金闕掌洪爐少年從事誇門地莫向樽前喜氣麤盧
答曰十姓胡中第六胡文章官職勝崔盧暫來關外分憂寄不稱賓筵喜
氣麤公極歡而罷

錢珣

字瑞文吏部尙書徽之子善文辭宰相王搏薦知制誥進中書舍人搏得
罪珣貶撫州司馬

珣客舍寓懷云灑灑灘聲晚霽時客亭風袖半披垂野雲行止誰相待明
月襟懷祇自知無伴偶吟溪上路有時偷笑臘前枝牽情景物潛惆悵忽
似傷春遠別離

春恨三首云負罪將軍在北朝秦淮芳草綠迢迢高臺愛妾魂銷盡始得
邱遲爲一招又云久戍臨洮報未歸篋香銷盡別時衣身輕願比蘭堦蝶

萬里還尋塞草飛又云永巷頻聞小苑遊舊恩如淚亦難收君前願報新
顏色團扇須防白露秋

蜀國偶題云忽憶明皇西幸時暗傷潛恨竟知誰佩蘭應語宮臣道莫向
金盤進荔枝

送王郎中云惜別遠相送卻成惆悵多獨歸迴首處爭那暮山何
未展芭蕉云冷燭無煙綠蠟乾芳心猶卷怯春寒一緘書笥藏何事會被
東風暗拆看

盧駢

盧駢員外一日休于青龍僧舍詞氣悽慘暮歸促命筆題南楣曰壽夭雖
云命榮枯亦太偏不知雷氏劍何處更衝天題畢草草而去涉旬卒咸通
進士也

嚴暉

皮日休傷嚴子重序云余爲童在鄉校時簡上抄杜舍人牧之集見有與

進士嚴惲詩後至吳一日有客曰嚴某余志其名久矣遽懷文見造于是樂甚觀其所爲文工于七字往往有清便柔媚時可軼駿于常軌其佳者曰春光冉冉歸何處更向花前把一杯盡日問花花不語爲誰零落爲誰開余美之諷誦未嘗忘生舉進士亦十餘計偕余方寃之謂終有得于時也未幾歸吳興後兩月咸通十年也嘗人至云生以疾亡于所居矣噫生徒以詞聞于士大夫竟不名而逝豈止此而湮沒耶江湖閒多美材士君子苟樂退而有文者死無不爲時惜可勝言耶于是哭而爲詩魯望生之友也嘗與我作詩云十哭都門榜上塵蓋棺終是五湖人生前有敵唯丹桂沒後無家祇白蘋箸下斬新醒處月江南依舊詠來春知君精爽應無盡必在項成鄴都宮頌曰鄴都頌帝晨曰紂絕標帝晨

陸魯望云嚴子重以詩遊于名勝閒舊矣余晚于江南相遇甚樂不幸且沒襲美作詩序而弔之其名真不朽矣又何戚其死哉余因息悲而爲之和云每值江南日落春十年詩酒愛逢君芙蓉湖上吟船倚翡翠巖前醉

馬分祇自汀洲連舊業豈無章疏動遺文猶憐未卜佳城處更斷要離家
畔雲

王渙 裴贊

大順中王渙自左史拜考功員外同年李德鄰自右史拜小戎趙光胤自
補袞拜小儀王拯自小版拜小勳渙首唱長句感恩上裴公曰青衿七十
榜三年建禮含香次第遷珠彩下連星錯落桂花曾對月嬋娟玉經磨琢
多成器劍拔沈埋更倚天應念銜恩最深者春來爲壽拜尊前裴公答曰
謬持文柄得時賢粉署清華次第遷昔歲策名皆健筆今朝稱職並同年
各懷器業寧推讓俱上青霄肯後先何事老來猶賦詠欲將酬和永留傳
渙惆悵詩云冰蠶薄絮鴛鴦綺半夜佳期並枕眠鍾動紅娘喚歸去對人
勻淚拾金鈿又云李夫人病已經秋漢武看來不舉頭得所一作媿濃華銷
歇盡楚魂湘血一生休又云謝家池館花籠月蕭寺房廊竹颭風夜半酒
醒憑檻立所思多在別離中又云隋師戰艦欲亡陳國破應難保此身訣

別徐郎淚如雨鑑鸞分後屬何人又云七夕瓊筵往事陳蓼花蓮蒂共傷
神蜀王殿裏三更月不見驪山私語人又云夜寒春病不勝懷玉瘦花啼
萬事乖薄倖檀郎斷芳信驚嗟猶夢合歡鞋又云嗚咽離聲管吹秋妾身
今日爲君休齊奴不說平生事忍看花枝謝玉樓又云青絲一綰墮雲鬢
金剪刀鳴不忍看持謝君王寄幽怨可能從此住人間又云陳宮興廢事
難期三閣空餘綠草基狎客淪亡麗華死他年江令獨來時又云晨肇重
來路已迷碧桃花謝武陵溪仙山目斷無尋處流水潺湲日漸西又云少
卿降北子卿還朔野離觴慘別顏卻到茂陵唯一慟節毛零落鬢毛斑又
云夢裏分明入漢宮覺來燈背錦屏空紫臺月落關山曉腸斷君恩信畫
工

渙字羣吉大順二年侍郎裴贄下登第德鄰拯光胤皆同年也

張曙

張曙崔昭緯中和初同舉相與詣日者問命曙時自負才名籍甚以爲將

來狀元崔亦分居其下日者殊不顧曙第目崔曰將來萬全高第曙有慍
色日者曰郎君亦及第然須待崔拜相當此時過堂既而曙果不終場昭
緯首冠曙以篇什刺之云千里江山陪驥尾五更風水失龍鱗昨夜浣花
溪上雨綠楊芳草爲何人後七年昭緯爲相曙方登第果于昭緯下過堂
杜荀鶴同年生也酬曙詩云天上書名天下傳引來齊到玉皇前大仙錄
後頭無雪至藥成來竈絕煙笑躡紫雲金作闕夢拋塵世鐵爲船九華山
叟驚凡骨同到蓬萊豈偶然

翁綬

詠酒云消暑迎秋復送秋無非綠蟻滿盃浮百年莫惜千迴醉一盞能消
萬古愁幾爲芳菲眠細草曾因雨雪上高樓平生名利關身者不識狂歌
到白頭

綬登咸通進士第

戴司顏

景福中江西節度使鍾傳遣僧從約進法華經一千部上待之甚厚恩渥有加宣從約入內賜齋面錫紫衣一副將行太常博士戴司顏以詩贈行略曰遠來朝鳳闕歸去戀元侯時吳子華任中諫司顏仰公之名志在屬和以爲從約之資融覽之拊掌大笑曰阿師更不要見便把拽出得其承奉如此

司顏登大順進士第

孫定

定字志元涪州大戎之族子長于儲定數舉矣儲方欲就貢訪于定定諶曰子儀表堂堂好將軍材何必以科第爲資儲銜之後儲貴達未嘗言定之長晚年喪志放意杯酒景福二年下第遊京西開遠門醉中走筆寄儲全唐詩作寄孫儲詩曰行行血淚灑塵襟事逐東流渭水深秋跨蹇驢風尙緊靜投孤店日初沈一枝酒挂東堂夢千里空馳北巷心明月愁歌又前去滿城煙樹噪春禽定詩歌千餘首多委于兵火竟無成而卒

唐詩

紀事

卷第六十六

七

無錫丁氏校刊

趙牧

牧不知何許人也大中咸通中效李長吉爲短歌對酒曰雲翁耕扶桑種
黍養日烏手按六十花甲子循環花落如弄珠長繩繫日未是愚有翁臨
鏡捋白鬚饑魂弔骨吟古書馮唐八十無高車人生如雲在須臾何乃自
苦八尺軀裂衣換酒且爲娛勸君朝飲一瓢夜飲一壺杞天崩雷騰騰紂
非舜是何足憑桐君桂父豈勝我醉裏白龍多上昇菖蒲花開魚尾定金
丹始可延君命其餘尤尙輕巧詞多不載

唐詩自咸通而下不足觀矣亂世之音怨以怒亡國之音哀以思氣喪而
語偷聲煩而調急甚者忿目褊吻如戟手交罵大抵王化習俗上下俱喪
而心聲隨之不獨士子之罪也其來有源矣司空圖輩傷時思古退已避
禍清音泠然如世外道人所謂變而不失正者也余故盡取晚唐之作庶
知律詩末技初若虛文可以知治之盛衰

注門族甲天下因宦家于荆南舉進士二十上不第嘗賦詩曰惆悵興亡
係綺羅世人猶自選青娥越王解破夫差國一箇西施也太多晚年失意
賦酒胡子一篇云同心相遇思同歡擎出酒胡當玉盤盤中餽飢不自定
四座清賓注意看可亦不在心否亦不在面徇客隨時自圓轉酒胡五藏
屬他人十分亦是無情勸爾不耕亦不饑爾不蠶亦有衣有眼不能分黼
黻有口不能明是非鼻何尖眼何碧儀形本非天地力雕鐫匠意苦多端
翠帽珠衫巧妝飾長安斗酒十千酤劉伶平生爲酒徒劉伶虛向酒中死
不得酒池中拍浮酒胡一滴不入眼空令酒胡名酒胡

鄭愚

咸通中愚自禮部侍郎徐鎮南海時崔魏公在京南愚著錦襖子半臂袖
卷謁文公大奇之會夜飲更衣賓從閒竊謂公曰此應是慚其不稱旣而
復易紅錦尤加煥麗衆莫能測愚爲進士時未嘗以文章及魏公門至是
乃贄所業崔歎賞曰眞銷得錦半臂矣

愚作大瀉靈祐師銘云湖之南湘之西山大瀉深無蹊虎日嘯猿又啼雨
撼撼風淒淒高入雲不可梯雖欲去誰與摧彼上人忘其身一宴坐千餘
旬去無疎來無親夷積阻架嶙岫棟自成供養陳我不知徒自勤物之生
孰無情識好惡知寵驚真物藏百慮呈隨婉轉任崢嶸雲糊天月不明金
在鑛火收瑩我不知天地先無首尾功用全六度備萬行圓常自隨在畔
邊要卽用長目前非艱難不幽玄哀世徒若馳驅覓作佛何其愚算海沙
登迷廬眠喘喘心區區見得失係榮枯棄知覺求形模近似遠易復難但
無事心卽安少思慮簡悲歡淨蕩蕩圓團團更無物不勞看聽他語被人
謾生必死理之常榮必悴非改張造衆罪欺心王作少福須天堂善惡報
正身當自結果無人將心作惡口脫空欺木石嚇盲聾牛阿旁鬼五通專
覷捕見西東禁定住陽朦朧與作爲事不同最上乘有想基無結淨本無
爲人不見自心知動便是莫狐疑直下說沒文詞識此意見吾師

愚廣州人唐末爲相

王鐐

王鐐富有詞學數舉未捷門生盧肇等公薦于春官云同盟不詞賢者受譏相子負薪優臣致誚乃旌鐐嘉句曰擊石易得火扣人難得心今日朱門者曾恨朱門深聲藹然果擢上第鐐登咸通進士第宰相王播之弟炎生二子鐸鐐鐸相僖宗鐐累官至汝州刺史王仙芝陷郡城鐐貶韶州司馬終太子賓客

陳琬

鴻之子也咸通中佐廉使郭常侍銓于徐性耿介有所不合挈家居茅山平居焚香習禪妻子罕面寄居蘭若自述檀經三卷臨行留一章與其僧云行若獨輪車常畏大道覆止若圓底器常恐他物觸行止既如此安得不離俗乾符中弟璉佐薛能幕于徐琬自丹陽棹小舟與相見能重其人延入城不可曰某已有誓不入公門矣薛移舟赴之話道永日不宿而去

唐詩紀事卷第六十七

李嶸

袁皓

歐陽澥

徐振

李濤

王貞白

王祝

劉谷

李昌鄴

王滌

李縞

高衢

張綺

韋冰

陸貞洞

王碩

薛昭緯

鄭合敬

許晝

程賀

裴鏞

張孜

顧雲

李昭象

李嶸

李蔚鎮江淮有李嶸者獻詩云雞樹煙含瑞氣凝鳳池波待玉山澄國人久倚東關望擬築沙堤到廣陵後果入相

袁皓

皓書師曠廟文云吟篁怨桐天其聲乎鏘石鏗金天其文乎擊革鳴絲天其暢乎匏土之韻天其和乎天有至音寄斯八物先生不生斯音鬱鬱先生既生斯音在律嗚呼先生之耳時可求也先生之心不可得也大哉樂

乎先生之無神乎愚固狂而不可據先生之有神乎愚堅誠而乞其圖先生之耳有神乎化爲天下之耳先生之心有神乎化爲天下之心古者可以舒于今然後家家知舜琴

羅隱贈袁侍御詩云風塵慚上品才業愧明時千里芙蓉幕何由話所思皓宜春人咸通進士龍紀集賢殿圖書使自稱碧池處士

僖宗狩蜀皓時爲倉部員外采李晟功烈爲興元聖功錄徧賜諸將表勵之

皓初登第過岳陽悅妓藥珠以詩寄嚴使君曰得意東歸過岳陽桂枝香惹藥珠香也知暮雨生巫峽爭柰朝雲屬楚王萬恨只憑期尅手寸心唯係別離腸南亭宴罷笙歌散回首煙波路渺茫嚴君以妓贈之

皓及第後作云金榜高懸姓字真分明折得一枝春蓬瀛乍接神仙侶江海迴思耕釣人九萬搏扶排羽翼十年辛苦涉風塵昇平時節逢公道不覺龍門是嶮津

歐陽澥

閩川歐陽澥者四門詹之孫也澥娶婦經旬而辭赴舉久不還家詩云黃菊離家十四年又云離家已是夢松年又云落日望鄉處何人知客情自憐十八年之帝鄉未遇知己也亦爲燕詩以獻主司鄭愚曰翩翩雙燕畫堂開送古迎今幾萬迴長向春秋社前後爲誰歸去爲誰來澥出入場中僅二十年善和韋中令在閣下澥卽行卷及門凡十餘載未嘗一面而澥慶弔不虧韋公雖不言而心念其人和初公隨駕至蜀命相時澥寓居漢南公以書令襄帥劉巨容俾澥計偕巨容得書大喜待以厚禮首薦之撰日遵路無何一夕心痛而卒巨容因籍澥答書呈于公公覽之憮然因曰十年不見灼然不錯

徐振

雷塘云九重城闕悲涼盡一聚園林怨恨長花憶所爲猶自笑草知無道更應荒詩名占得風流在酒興催教運祚亡若問黃天惆悵事只應斜日

照雷塘古意云擾擾都城曉又昏六街車馬五侯門箕山渭水空明月可
是巢由絕子孫

右二詩韋莊
取爲又玄集

李濤

李濤長沙人也篇詠甚著如水聲長在耳山色不離門又掃地樹留影拂
牀琴有聲又落日長安道秋槐滿地花皆膾炙人口溫飛卿任太學博士
主秋試濤與衛丹張邵等詩賦皆勝于都堂

王貞白

貞白唐末大播詩名御溝爲卷首云一派御溝水綠槐相蔭清此波涵帝
澤無處濯塵纓鳥道來雖險龍池到自平朝宗心本切願向急流傾自謂
冠絕無瑕呈僧貫休休曰甚好只是賸一字貞白揚袂而去休曰此公思
敏書一字于掌中逡巡貞白迴忻然曰已得一字云此中涵帝澤休將掌
中字示之一同天祐年中內試貞白札翰狼籍帝覽拂下玉案有黃門奏
此舉人有詩名御批曰粗通放

貞白寄鄭谷曰五百首新詩緘封寄與誰祇憑夫子鑒不要俗人知火鼠
重收布冰蠶乍吐絲直須天上手裁作領巾披

僧貫休送貞白重試及第東歸云心苦酬心了東歸謝所知可憐經試者

如折兩三枝雨毒逢花少山多愛馬遲此行三可羨正值倒戈時

江西解圍

昭宗皇帝頗爲寒進開路崔合州凝典貢舉但是子弟無問文章其閒屈
人不少孤寒中唯程晏黃滔擅場之外如貞白張蠙詩題觀文古風皆臻
前輩之闡闕者也

貞白字有道

王祝

會昌時有題三鄉者曰余本若耶溪東與同志者二三紉蘭佩蕙每貪幽
閒之境翫花光于松月之亭竟晝綿宵往往忘倦泊乎初筭至于五換星
霜矣自後不得已從良人西入函關寓居晉昌里第其居迴絕囂塵花木
叢翠東西鄰二佛宮皆上國勝遊之最伺其閒寂因遊覽焉亦不辜一時

之風月也不意良人已矣邈然無依帝里方春光景東邁涉澆水歷渭川
背終南陟太華經虢略抵陝郊捐嘉祥之清流面女兒之蒼翠凡經過之
所皆曩昔讌笑之地銜冤茹歎舉目魂銷雖殘骸尙存而精爽都失假使
潘岳復生無以悼其幽思也遂命筆聊題終不能滌其懷抱絕筆慟哭而
東時會昌壬戌歲仲春十九日也詩曰昔逐良人西入關良人身歿妾空
還謝娘衛女不相待爲雨爲雲歸舊山和者十人祝和三鄉詩云女兒山
前嵐氣低佳人留恨此中題不知雲雨歸何處空使王孫見卽迷

祝字不耀名家子唐末爲給事中巢寇前典常州旣亂寄江湖甚有時望
及詔召經陝時王拱爲帥凶暴以厚禮降接願居子姪之末祝堅不許拱
怒罷宴命將吏速請離館害于途悉投其家于黃河時朝廷多故捨而不
問祝一子行至襄州亦無故投井而卒

劉谷

三鄉詩云蘭蕙芬芳見玉姿路傍花笑景遲遲苧蘿山下無窮意併在三

鄉惜別時

李郢送谷詩云村樓西路雪初晴雲暖沙乾馬足輕寒澗渡頭芳草色新
梅嶺外鷓鴣聲郵亭已送輕車發山館誰將候火迎落日千峯轉迢遞知
君回首望高城又和谷除夜見寄云坐恐三更至流年此夜分客心無限
事愁雨不堪聞灞上家殊遠鑪前酒易醺劉郎亦多恨詩憶故山雲

李昌鄴

三鄉詩云紅粉蕭娘手自題分明幽怨發雲闈不應更學文君去泣向殘
花歸剡溪

王滌

三鄉詩云浣沙遊女出關東舊跡新詞一夢中槐陌柳亭何限事年年迴
首向春風
滌字用霖及景福進士第

李縞

三鄉詩云當時王謝兩風流王子沈淪謝女愁歸思若隨文字在路傍空
爲感千秋

高衢

三鄉詩云南北千山與萬山軒車誰不思鄉關獨留芳翰悲前跡陌上恐
傷桃李顏

張綺

三鄉詩云洛川依舊好風光蓮帳無因見女郎雲雨散來音信斷此生遺
恨寄三鄉

韋冰

三鄉詩云來時歡喜去時哀家國迢迢向越臺待寫百年幽思盡故宮流
水莫相催

冰唐末爲鄆令

陸貞洞

三鄉詩云惆悵殘花怨暮春孤鸞舞鏡倍傷神清詞好箇千人事疑是文
姬第二身

貞洞唐末吳郡進士

王碩

無姓無名越水濱芳詞空怨路旁人莫教才子偏惆悵宋玉東家是舊鄰
碩唐末人

薛昭緯

華州勝昭緯寄諸門生詩曰時君過聽委平衡粉署華燈到晚明開卷固
難窺浩汗熱心空欲慕公平機雲筆舌臨文健沈宋篇章發詠清自笑觀
光輝自此闕

昭緯以侍郎掌貢舉試未明求衣賦王贊圖爲勝首

薛保遜大中朝尤肆輕佻侵侮諸叔自起居舍人貶洗馬而卒昭緯其子
也頗有父風嘗任祠部外郎時李系任小儀王堯任小賓正旦立仗班退

唐詩紀事

卷第六十七

五

無錫丁氏校刊

昭緯吟曰左金烏而右玉兔天子旌旂薨遽請下句昭緯應聲曰上李系而下王薨小人行綴天復中自臺丞累貶礪州司馬中書舍人顏薨當制略曰陵轢諸父代嗣其凶薛存誠之子廷老廷老之子保遜保遜之子昭緯爲乾寧禮部侍郎性輕率坐事貶礪州刺史

鄭合敬 一作鄭合

合敬及第後宿平康里詩曰春來無處不閒行楚潤相看別有情好是五更殘酒醒時時聞喚狀頭聲

楚潤
妓也

合敬乾符三年登上第終諫議大夫

許書

許書者睢陽人天復四年大駕東幸駐趨甘棠晝于此及第梁太祖長子大卿者常與晝屬和君以卿爲奧主隨駕至洛攜同年醉梁祖私第因折其牡丹主吏馳報梁祖大卿竊知之先遣晝行遂亡命河北閩人黃遇嘗宰滑州衛南與晝聲跡不疎光化三年求選京師遇謗晝嘗答背矣時內

翰吳融侍郎獨孤損皆畫知己一旦畫造二君子自辨因袒而視之二公掩袂而入畫遇其年俱落

畫中秋月云應是蟾宮別有情每逢秋半倍澄清清光不向此中見白髮爭教何處生閒地占將真可惜幽窗分得始爲明慙慙好長來年桂莫遣平人道不平

程賀

賀有君山詩時號程君山詩云曾遊方外見麻姑說道君山自古無云是崑崙山頂石海風飄落洞庭湖

崔亞典眉州賀爲廳僕崔見其風味不常問曰爾讀書乎曰薄涉藝文崔指一物令詠之雅有意旨因令歸選獎稱于諸公閒凡二十五舉及第時中和二年也入京則館博陵之第亞卒賀服衰三年

裴鏞

乾符五年鏞以御史大夫爲成都節度副使題石室詩曰文翁石室有儀

形庠序千秋播德聲古柏尙留今日翠高岷猶藹舊時青人心未肯拋羶
蟻弟子依前學聚螢更歎沱江無限水爭流祇願到滄溟時高駢爲使時
亂矣故劔詩有願到滄溟之句有微旨也劔作傳奇行于世

張孜

懿僖之代有京兆張孜者耽酒如狂與李山甫善有雪詩云長安大雪天
烏雀難相覓其中豪貴家搗椒泥四壁到處爇紅爐周迴下羅幃暖手調
金絲蘸甲斟瓊液醉唱玉塵飛困融香汗滴豈知饑寒人腳生皴劈
僖宗在蜀孜有傷時之作其閒云著牙賣朱紫斷錢賒舉選帝還京相府
遣人捕之孜易姓越淮而遯

世傳孜夢李曰歌有華山秀作英雄骨黃河瀉出縱橫才又云夢破青霄
春煙霞無去塵若誇郭璞五色筆江淹卻是尋常人

顧雲

雲字垂象池州饒賈之子也風韻詳整與杜荀鶴殷文圭友善同肄業九

華咸通中登第爲高駢淮南從事師度之亂退居雪川杜門著書宰相杜某奏雲與盧知猷陸希聲錢珣馮渥司空圖等分修宣懿德三朝實錄皆一時之選也書成加虞部外郎乾寧初卒有文號鳳策聯華編稿昭亭雜筆

雲在淮南李昭象以學仙詞寄之云記得初傳九轉方碧雲峯下祝虛皇丹砂未熟心徒切白日難留鬢欲蒼無路洞天尋穆滿有時人世羨劉郎仙人恩重何由報焚盡星壇午夜香蓋招隱之義也

雲大順中制同羊昭業等十人修史雲至江淮遇高逢休諫議時劉子長爲僕射其弟崇望復在中書雲叩逢休希致先容逢休許之久矣雲臨歧請書授之一函甚草創雲微有惑潛啓閱之凡一幅並不言雲但曰羊昭業等擬將一尺三寸汗腳踏他燒殘龍尾道懿宗皇帝雖薄德不任被前件人羅織執大政者亦太悠悠雲歎而已

雲詠柳云閒花野草總爭新眉皺絲乾獨不勻乞與東風殘氣力莫教虛

度一年春

雲爲虞部郎中高駢淮南從事駢章疏不恭皆雲之辭也雲著述目爲鳳策聯華雲初下第鄭谷有詩勉之云鳳策聯華是國華春來偶爲上仙槎鄉連南渡思菰米淚滴東風避杏花吟聒暮鶯歸廟院睡消遲日寄僧家一般情緒應相信門靜莎深樹影斜

李昭象

字化文池州刺史方玄之子父卒因家焉懿宗末年以文干相國路公巖問其年曰十有七年矣巖年尙少尤器重之薦于朝將召試會巖貶遂還秋浦移居九華與張喬顧雲輩爲方外友龍紀中楊行密奔宣州以書招之不從

題顧正字谿居云高敞吟軒近釣灣塵中來似出人閒若教明月休生桂應得危時共掩關春酒夜棊難放客短籬疎竹不遮山莫誇恬淡勝榮祿鴈引行高未許閒

寄獻山中顧公員外云抽卻朝簪著釣簑近來聲迹轉巍巍祥麟避網雖
山野丹鳳銜書卽薜蘿乍隱文章情更逸久閒經濟術翻多深慙未副吹
噓力竟困風埃爭奈何

山中寄崔諫議云半生猿鳥共山居吟月吟風兩鬢疎新句未嘗忘教化
上才爭忍不吹噓全家欲去干戈後大國中興禮樂初從此升騰休說命
祇希公道數封書

喜杜荀鶴及第云深巖貧復病榜到見君名貧病渾如失山川頓覺清一
春新酒興四海舊詩聲日使能吟者西來步步輕

赴舉出山留寄山居鄭參軍云還如費冠卿向此振高名肯羨魚鬚美長
誇鶴氅輕理琴寒指倦試藥黑髭生時泰難雲臥隨看急詔行

一
 二
 三
 四
 五
 六
 七
 八
 九
 十
 十一
 十二
 十三
 十四
 十五
 十六
 十七
 十八
 十九
 二十
 二十一
 二十二
 二十三
 二十四
 二十五
 二十六
 二十七
 二十八
 二十九
 三十
 三十一
 三十二
 三十三
 三十四
 三十五
 三十六
 三十七
 三十八
 三十九
 四十
 四十一
 四十二
 四十三
 四十四
 四十五
 四十六
 四十七
 四十八
 四十九
 五十
 五十一
 五十二
 五十三
 五十四
 五十五
 五十六
 五十七
 五十八
 五十九
 六十
 六十一
 六十二
 六十三
 六十四
 六十五
 六十六
 六十七
 六十八
 六十九
 七十
 七十一
 七十二
 七十三
 七十四
 七十五
 七十六
 七十七
 七十八
 七十九
 八十
 八十一
 八十二
 八十三
 八十四
 八十五
 八十六
 八十七
 八十八
 八十九
 九十
 九十一
 九十二
 九十三
 九十四
 九十五
 九十六
 九十七
 九十八
 九十九
 一百

唐詩紀事卷第六十七

唐詩紀事卷六十八

殷文圭

唐彥謙

裴澈

盧攜

韋莊

吳融

公乘億

羅鄴

羅袞

殷文圭

文圭池州人居九華小字桂郎苦學所用墨池底爲之穴舉進士中途遇一叟鬚白眉綠拳文入口神仙狀也曰如學道當沖虛爲儒當大有名於天下唐末詞場請託公行文圭與游恭獨步場屋乾寧中帝幸三峯文圭攜梁王表薦及第仍列榜中尋爲裴樞宣諭判官至大梁朱全忠表薦之既而由汴梁馳歸全忠大怒遣吏捕之不及矣自是屢言措大率皆負心每以文圭爲證白馬之禍蓋自此也文圭事楊行密終左千牛衛將軍子崇儀自江南歸朝改姓湯名悅

九華賀雨吟云陶公焦思念生靈變旱爲豐合杳冥雷劈老松疑虎怒雨衝陰洞覺龍腥萬畦香稻蓬蔥綠九朶奇峯撲亞青吟賀西成饒旅興散

絲飛灑滿長亭

贈池州張太守云神珠無類玉無瑕七葉簪貂漢相家陣面奔星破犀象
筆頭飛電躍龍蛇絳幃夜坐窮三史紅旆春行到九華只怕他人留不住
別遷征鎮擁高牙

和友人送衡尚書赴池陽副車云淮王上將例分憂玉帳參承半列侯次

第選材如創廈別離排宴向藏舟鷗鵬變化知難測龍蠖昇沈各有由躑

蹠行牽金鏹

亡犯切
馬首飾

重嬋娟立唱翠蛾愁築頭勳業諧三陣滿腹詩書究

九流金海珠韜乘月讀肉芝芽茗撥雲收赤麟旆卷鷗汀晚青雀船橫雁

陣秋十字細波澄鏡面九華殘雪露峯頭醉沈北海千罇酒吟上南荆百

尺樓況是昭明食魚郡不妨閒擲釣璜鉤

文圭賀池陽太守正命云泉口聲光誇漢將築頭勳業佐淮王

中秋自宛陵寄池陽太守云出山三見月如眉蝶夢終宵遶戟枝旅客思

歸鴻去日賢侯行化子來時郡樓遐想劉琨嘯相閣方窺謝傅碁按部况

聞秋稼熟馬前迎拜羨并兒

次韻九華杜先輩重陽寄投宛陵丞相云日下飛聲徹不毛酒醒時得廣
離騷先生鬢爲吟詩白上相心因治國勞千乘信迴魚榼重九華秋迴鳳
巢高強酬小謝重陽句沙恨無金盡日淘

寄賀杜荀鶴及第云一戰平疇五字勞書歸鄉去錦爲袍大鵬出海翎猶
溼駿馬辭天氣正豪九子舊山增秀絕二南新格變風騷由來稽古符公
道平地丹梯甲乙高

文圭杜荀鶴楊夔康駟夏侯淑王希羽等皆爲淮南將田頴上客文圭有
美名不應朱全忠錢鏐之辟頴置田宅迎其母以甥事之故文圭爲盡力
夔知頴不足抗楊行密著湯賦以戒頴不用果敗文圭常薦於全忠復擬
飾非投啓于公卿略曰於菟獵食非求尺璧之珍鷄鷓避風不望洪鐘之
樂旣登第卽南歸俄爲多言者所發全忠捕之則不及矣

或云文圭應舉嘗經大澤中驟雨震雷衆駭躡獨安詳如不聞雨定傍人

見其兩耳中鬼神以泥封之後爲內翰草司空李德誠麻潤毫久不至爲
詩督之云紫殿西頭月欲斜曾草臨淮上相麻潤筆已曾經奏謝更將章
句問張華時論少之

唐彥謙

唐儉裔孫憲宗時終中書舍人次子持持子彥謙字茂業歷慈絳澧三州
刺史自號鹿門先生陶穀之祖也穀避晉祖諱改姓陶後遂不易識者非
之

中秋翫月云一夜高樓萬景奇碧天無際水無涯只留皎月當層漢竝送
浮雲出四維霧靜不容玄豹隱冰生唯恐夏蟲疑坐來離思憂將曉爭得
嫦娥子細知

上巳日寄韓公云上巳接寒食鶯花寥落晨微微潑火雨草草踏青人涼
似三秋景清無九陌塵與余同病者對此合傷神

七夕云露白風清夜向晨小星垂佩且埋輪絳河浪淺休相隔滄海波深

尙作塵天外鳳凰何寂寞世閒烏鵲謾辛勤倚欄殿北斜樓上多少通宵
不寐人

八月十六日夜月云斷腸佳賞固難期昨夜消魂更不疑丹桂影空蟬有
露綠槐陰在鵲無枝懶將吟咏聊惆悵早是疏頑耐別離堪恨賈生曾慟
哭不緣清景爲憂時

過長陵詩云耳聞英主提三尺眼見愚民盜一抔千古腐儒騎瘦馬灞陵
斜日重回頭

題蒲津河亭云煙橫博望乘槎水月上文王避雨陵最善用事

詠柳云惹絆風光別有情世閒誰敢鬪輕盈楚王江畔無端種餓損宮腰
學不成

彥謙學義山爲詩

裴澈

澈登咸通進士第後爲相初左拾遺孟昌圖在蜀上疏極諫僖宗田令孜

惡之沈諸墓頤江澈以詩弔曰一章何罪死何名投水惟君與屈平從此
蜀江煙月夜杜鵑應作兩般聲

盧攜

嘗題司空圖壁云姓氏司空貴官班御史卑老夫如且在不用嘆屯奇
攜字子升乾符中爲相巢寇表求天平節度不與欲倚高駢立功巢遂入
關攜仰藥死

韋莊

立春云青帝東來日馭遲暖煙輕逐曉風吹罽袍公子樽前覺錦帳佳人
夢裏知雪圃乍開紅菜甲綵幡新翦綠楊絲殷勤欲獻宜春曲題向花牋
帖繡楣

長安清明云早是傷春夢雨天可堪芳草更芊芊內官初賜清明火上相
閒分白打錢紫陌亂嘶紅叱撥綠楊高映畫鞦韆遊人記得承平事暗喜
風光似昔年

感懷詩云長年方悟少年非人道新詩勝舊詩十畝野塘留客釣一軒春
雨對僧碁花閒醉任黃鶯語亭上從吟白鷺窺大道不將爐冶去有心重
築太平基或謂此詩包括生成果爲台輔

莊應舉時遇巢寇犯闕著秦婦吟云內庫燒爲錦繡灰天街踏盡公卿骨
公卿多訝莊諱之時號秦婦吟秀才又有帝子夢魂煙水闊謝公詩思碧
雲低最爲警策至若閒臥詩云誰知閒臥意非病亦非眠又手從雕扇落
頭任漉巾偏識者知其不祥後誦子美詩白沙翠竹江村暮相送柴門月
色新吟諷不輟是歲卒於花林坊葬於白沙

莊字端己杜陵人見素之後曾祖少微宣宗中書舍人莊疎曠不拘小節
李詢爲兩川宣諭和協使辟爲判官以中原多故潛欲依王建建辟爲掌
書記尋召爲起居舍人建表留之後相建爲僞平章事

莊爲王建管記時一縣宰乘時擾民莊爲建草牒云正當凋瘵之秋好安
凋瘵勿使瘡痍之後復作瘡痍時以爲口實

莊集詩人一百五十人得詩三百章爲又玄集序云此蓋詩中鼓吹名下
笙簧擊鳧氏之鐘霜清日觀淬雷公之劍影動星津雲閒分合璧之光海
上運摩天之翅奪造化而雲雷噴湧役鬼神而風雨奔馳但思食馬留肝
徒云染指豈慮烹魚去乙或致傷鱗

吳融

壬戌閏卿卜居云六載抽毫侍禁闈不堪多病決然歸五陵少年如相問

阿對泉頭一布衣

阿對是楊伯起家僮嘗引泉灌蔬其泉至今尚在

華清宮云中原無鹿海無波鳳輦鑿旂出幸多今日故宮歸寂寞太平功
業在山河又云四郊飛雪暗雲端唯此宮中落旋乾綠樹碧簷相掩映無
人知道外邊寒又云漁陽烽火照函關玉輦愬愬下此山一曲羽衣聽不
盡至今遺恨水潺潺

關東獻劉員外云昨夜星辰動仙郎近漢關玳筵吟雪罷錦帳押春還已
到青雲上應棲絳圃閒臨邛有辭賦一爲奏天顏

李巨川爲華帥韓建掌書記昭宗至華清宮賜建御容一軸時巨川草謝表以示融集中有形雲似蓋以長隨紫氣臨關而不度融吟咏不已因草篇與巨川對壘略曰霧開五里容諧披覩之心掌拔一峯兼助捧持之力松江晚泊云樹遠天疑盡江奔地欲隨孤帆落何處殘日更新離客是淒涼本情爲繫滯枝寸腸無計免應只楚猿知

紅樹云一聲南雁已先紅
槭槭淒淒葉葉同
自是孤根非暖地
莫驚他木耐秋風
燒煙散去陰全薄
明月臨來影半空
長憶洞庭千萬樹
照山橫浦夕陽中

融字子華越州人昭宗時爲翰林學士卒於官

公乘億

高湜咸通末爲禮部侍郎士多繇權要干請湜曰吾決以至公取之得禮固吾分乃取億及許棠聶夷中皆有文名

億字壽仙魏人與李山甫皆爲魏博樂彥禎幕府

羅隱寄詩於易定公乘億云謝舞仍宮柳高奇世少雙侍中生不到園令
死須降班秩通烏府罇疊奉碧幢昭王有餘烈試爲禱迷邦

億郎官上應列宿詩云北極佇文昌南宮曉拜郎紫泥乘帝澤銀印佩天
光緯結三台側鉤連四輔傍佐商依傅說仕漢笑馮唐委佩搖秋色峨冠
戴曉霜自然符列象千古耀巖廊

秋菊有佳色云陶令籬邊菊秋來色轉佳翠攢千片葉金翦一枝花蘂逐
蜂鬚亂英隨蝶翅斜帶香飄綠綺和酒上烏紗散漫搖霜彩嬌妍滿日華
芳菲彭澤見更稱在誰家

臨江遲來客云江上晚沈沈煙波一望深向來殊未至何處擬相尋柳結
重重眼萍翻寸寸心暮山期共眺寒渚待同臨北去魚無信南飛雁絕音
思君不可見使我獨謠吟

億以詞賦著名咸通十三年別家十餘年矣嘗大病鄉人傳已死其妻自
河北迎喪會億送客河上見婦人羸縷類其妻也睥睨不已妻亦如之詰

之馬是也相持而哭路人異之後旬日登第億嘗有詩云十上十年皆落第一家一半已成塵可知其屈矣

羅鄴

費拾遺書堂云滿袖歸來天桂香紫泥重降舊書堂自憐章帶同巢許不駕蒲輪佐禹湯怪石盡涵千古秀奇花多吐四時芳何人更肯追高躅惟有樵童戲薜牀

雲詩云紛紛靄靄徧江湖得路爲霖豈合無莫使悠颺祇如此帝鄉還更暖蒼梧

歲仗云玉帛朝天

元一作

萬國來雞人唱曉五門開春頒北極迎仙仗日捧

南山入壽杯歌舜薰風鏘玉佩祝堯嘉氣靄樓臺可憐四海車書混重見蕭曹佐漢才

牡丹云落盡春紅始見

一作著

花花時比屋事豪奢買栽池館恐無地看到

子孫能幾家門倚長衢攢繡輓幄籠輕日護香霞歌鐘到此爭權賞肯信

流年鬢有華

賞春云芳草和煙暖更青閒門要路一時生年年點檢人閒事惟有春風不世情

公子行云雕鞍玉勒照花明過後香風特地生半醉五侯門裏出月高猶在禁街行

鄴餘杭人父爲鹽鐵小使有二子俱以文學干進鄴尤長七言詩時宗人隱亦以律韻著稱然隱才雄而疎鄴才清而緻咸通中崔安潛侍郎廉問江西志在弓旌竟爲幕吏所沮旣而俯就督郵因茲舉事無成而卒

羅袞

清明登奉先城樓云年來年去只艱危春半堯山草尙衰四海清平耆舊見五陵寒食小春悲煙銷井邑隈樓檻雪滿川原泥酒卮拭盡賈生無限淚一行歸雁遠參差

清明赤水寺居云榆火輕煙處處新旋從閒望到諸隣浮生浮世祇多事

野水野花娛病身，濁酒不禁雲外景。碧峯猶冷寺前春，蓑衣毳衲誠吾黨。
自結村園一社貧。

羅隱梁開平中召拜夕郎不起，衰以小天倅大秋。姚公使兩浙，以詩贈隱，曰：「平日時風好，涕流讒書雖。盛一名休，寰區歎屈瞻。天問夷貊聞，詩過海求向夕。便思青瑣拜，近年尋伴赤松遊。何當世祖從人望，早以公台命卓侯。」隱答曰：「崑崙水色九般流，飲卽神仙憩。卽休敢恨守株曾，失意始知緣木更難求。鶴原謾欲均餘力，鶴髮那堪問舊遊。遙望北辰當上國，羨君歸棹五諸侯。」

昭宗誅韓全誨等，衰時爲左拾遺。上言劉蕡當大和時，宦官始熾，因直言策請奪爵土，復掃除之役，遂罹譴逐，死異土六十餘年。正人端士切齒飲泣，使蕡策蚤用，則杜漸防萌，逆節可消。帝感悟，贈蕡左諫議大夫。

唐詩紀事卷第六十九

羅虬

羅隱 劉贊

陸辰

羅虬

比紅兒詩并序云比紅者為雕陰官妓杜紅兒作也美貌年少機智慧悟不與羣輩妓女等余知紅者乃擇古之美色灼然于史傳三數十輩優劣于章句閒遂題比紅詩

姓氏看侵尺五天芳菲占斷百花鮮馬嵬好笑當時事虛賺明皇幸蜀川

金谷園中花正繁墜樓徒道感深恩齊奴恰是來東市不為紅兒死更冤

石崇生青州故小名齊奴

陷卻平陽為小憐周師百萬戰長川更教乞與紅兒貌舉國山河不直錢

小憐北齊後主馮淑妃名

一曲都緣張麗華六宮齊唱後庭花若教比竝紅兒貌枉破當時國與家樂營門外柳如陰中有佳人畫閣深若是五陵公子見買時應不啻千金

青絲高綰石榴裙腸斷當筵酒半醺置向漢宮圖畫裏入胡應不數昭君
斜凭欄干醉態新斂眸微眇不勝春當時若遇東昏主金葉蓮花是此人
匱市千山與萬山碧桃花下景長閒神仙得似紅兒貌應免劉郎憶世閒
越山重疊越溪斜西子休憐解浣紗得似紅兒今日貌肯教將去與夫差
詔下人閒覓好花月眉雲髻選人家紅兒若向當時見繫臂先封第一紗
鋒鏑縱橫不敢看淚垂玉筯正洑瀾應緣近似紅兒貌始得深宮奉五官
金縷濃薰百和香臉紅眉黛入時妝當時便向喬家見未敢將心在窈娘

喬知之
故事

通宵甲帳散香塵漢帝精神禮百神若見紅兒醉中態也應休憶李夫人
拔得芙蓉出水新魏家公子信才人若教瞥見紅兒貌不肯留情賦洛神
芳姿不合竝常人雲在遙天玉在塵因事愛思荀奉倩一生閒坐枉傷神
筆底如風思湧泉賦中休謾說嬋娟紅兒若在東家住不得登牆爾許年
一抹濃紅傍臉斜妝成不語獨攀花當時若是逢韓壽未必埋踪在賈家

樹裊西風日半沈地無人跡轉傷心阿嬌得似紅兒貌不費長門買賦金
五雲高捧紫金堂花下投壺侍玉皇從到世人都不識也應知有杜蘭香
戲水源頭指舊蹤當時一笑也難逢紅兒若爲迴桃臉豈比連催舉五烽
虢國夫人照夜璣若爲求得與紅兒辭和香態濃春睡一作裏一樹繁花偃
繡幃

知有持盈玉葉冠翦雲裁月照人寒若使紅兒風帽一作貌戴直似瑤池會
上看

明媚何曾讓玉環破瓜年幾百花顏若教貌向南朝見定卻梅妝似等閒
世事悠悠未足稱肯將閒事更爭能自從命向紅兒去一作斷不欲留心在
裂繪

自隱新從夢裏來嶺雲微步下陽臺含情一向春風笑羞殺凡花盡不開
拾卻青娥換玉鞍古來公子苦無端莫言一匹追風馬天驥牽來也不看
檻外花低瑞露濃夢魂驚覺暈春容憑君細看紅兒貌最稱嚴妝待曉鐘

薄羅輕翦越溪紋。鷓翅低從兩鬢分。料得相如偷見面，不應琴裏挑文君。
南國東鄰各一時。後來唯有杜紅兒。若教楚國宮人見，羞把腰身竝柳枝。
照耀金釵簇膩鬢。見時直向畫屏閒。黃姑阿母能判剖，十斛明珠也是閒。
輕小休誇似燕身。生來占斷紫宮春。漢皇若遇紅兒貌，掌上無因著別人。
鸚鵡娥如裏露紅。鏡前眉樣自深宮。稍教得似紅兒貌，不嫁南朝沈侍中。
擬將心地學安禪。爭奈紅兒笑靨圓。何物把來堪比竝，野塘初綻一枝蓮。
浸草漂花遶檻香。最憐穿度樂營牆。慙留滯緣何事，曾照紅兒一面妝。
雕陰舊俗騁嬋娟。有箇紅兒賽洛川。常笑世人語虛誕，今朝自見火中蓮。
渡口諸儂樂未休。堯陵西望路悠悠。石城有箇紅兒貌，兩漿無因迎莫愁。
誰向深山識大仙。勸人山上引春泉。定知不及紅兒貌，枉卻工夫漑玉田。

搜神記楊
雍伯故事

傾國傾城總絕倫。紅兒花下認真身。十年東北看燕趙，眼冷何曾見一人。
今時自是不諳知。前代由來豈見遺。一笑陽城人便惑，何堪教見杜紅兒。

京口喧喧百萬人競傳河鼓謝星津
柰花似雪簪雲髻今日天容是後身
青史書時未是真可能纖手卻強秦
再三爲謝齊皇后要解連環別與人
繡帳鴛鴦對刺紋博山微暖麝微熏
詩成若有紅兒貌悔道當時月墜雲
薄粉輕朱取次施大都端正亦相宜
只如花下紅兒態不藉城中半額眉
妝成渾欲認前朝金鳳雙釵逐步搖
未必慕容宮裏伴舞風歌月勝纖腰
琥珀釵成思正深玉兒妖惑蕩君心
莫教回首看妝面始覺曾虛擲萬金
自有閒花一面春臉檀眉黛一時新
慙爲報梁家婦休把啼妝賺後人
輕梳小髻號慵來巧中君心不用媒
可得紅兒拋醉眼漢皇恩澤一時迴
千里長江旦暮潮吳都風俗尙纖腰
周郎若見紅兒貌料得無心念小喬
月落潛奔暗解攜本心誰道獨單棲
還緣交甫非良偶不肯終身作羿妻
漢皇曾識許飛瓊寫向人間作畫屏
昨日紅兒花下見大都相似更娉婷
魏帝休誇薛夜來霧綃雲縠稱身裁
紅兒秀發君知否倚檻繁花帶露開
曉月雕梁燕語頻見花難可比他人
年年媚景臨何處長作紅兒面上春

逗玉濺盆冬殿開邀恩先賜夜明苔紅兒若是三千數多少芳心似死灰
畫簾垂地紫金牀暗引羊車駐七香若見紅兒此中住不勞鹽篠灑宮廊
蘇小空勻一面妝便留名字在錢塘藏鴉門外諸年少不識紅兒未是狂
一首長歌萬恨來若愁漂泊水難回崔徽有底多頭面費得微之爾許才
昔年黃閣識奇章愛說真珠似窈娘若見紅兒夜深態便應休說繡衣裳
鳳拆鸞離恨轉深此生難負百年心紅兒若向隋朝見破鏡無因更重尋
行綰穠雲立暗軒我來猶愛不成冤當時若見紅兒貌未必形相有此言
總似紅兒媚態新莫論千度笑爭春任伊孫武心如鐵不辦軍前殺此人
暖塘爭赴盪舟期行唱菱歌著豔詞爲問東山謝丞相可能諸妓勝紅兒
吳興皇后欲辭家澤國重臺展曙霞今日紅兒貌傾國恐須真宰別開花
陌上行人歌黍離三千門客欲何之若教粗及紅兒貌爭敢樓前斬愛姬
休話如皋一笑時金髻中臆錦離披陋容枉把彫弓射射盡春禽未展眉
長恨西風送早秋低眉深恨嫁牽牛若同人世長相對爭作夫妻得到頭

謝娘休漫逞風姿未必娉婷勝柳枝聞道只應嘲落絮何曾得似杜紅兒
總傳桃葉渡江時只爲王家一首詩今日紅兒自堪賦不須重唱舊來詞
巫山洛浦本無情總爲佳人便得名今日雕陰有神豔後來公子莫相輕
幾拋雲髻恨金墉淚洗花顏百戰中應有紅兒些子貌卻言皇后長深宮
倚檻還應有所思半開東閣見嬌姿可中得似紅兒貌若遇韓朋好殺伊
曉向妝臺一作紗窗與畫眉鏡中長欲助嬌姿若教得似紅兒貌走馬章臺任
道遲

練得霜華助翠鈿相期朝謁玉皇前依稀有似紅兒貌方得吹簫引上天
重門深掩幾枝花未勝紅兒莫大誇王相不能探物理可能虛上短轅車
前代休憐事可奇後來還出有光輝爭知晝臥紗窗裏不見神人覆玉衣
羽化嘗聞赴九天只疑塵世是虛傳自從一見紅兒貌始信人間有謫仙
從道長陵小市東巧將花貌占春風紅兒若是同時見未必伊先入紫宮
人間難免是深情命斷紅兒向此生不似前時李丞相枉拋才力爲鶯鶯

鳳舞香飄繡幕風暖穿馳道百花風還緣有似紅兒貌始道迎將入漢宮
休道將軍出世才盡驅諸妓下歌臺都緣沒箇紅兒貌致使輕教後閣開
馮媛須知住漢宮將身只是解當熊不聞有貌傾人國爭得今朝更似紅
能將一笑使人迷花豔何須上大堤疎屬便同巫峽路洛川真是武陵溪
辭輦當時意可知寵深還恐寵先衰若教得似紅兒貌占卻君恩自不疑
三吳時俗重風光末見紅兒一面妝好寫妖嬈與教看便應休更話真娘
波平楚澤浸星辰臺上君王宴早春畢竟章臺會中客冠纓虛絕爲何人
紅兒不向漢宮生便使雙成謾得名疑是麻姑惱塵世暫教微步下層城
天碧輕紗只六銖宛如含露透肌膚便教漢曲爭明媚應沒心情更弄珠
共嗟含恨向衡陽方寸花牋寄沈郎不似紅兒些子貌當時爭得少年狂
淺色桃花壓短牆不因風送也聞香凝情盡日君知否還似紅兒淡薄妝
火色櫻桃摘得初仙宮只有世閒無凝情盡日君知否真似紅兒口上朱
宿雨初晴春日長入簾花氣靜難忘凝情盡日君知否真似紅兒舞袖香

初月纖纖映碧池池波不動獨看時凝情盡日君知否真似紅兒舞罷眉
濃豔濃香雪壓枝裊煙和露曉風吹紅兒被掩妝成後含笑無人獨立時
樓上嬌歌裊夜霜近來休數踏歌娘紅兒謾唱伊州遍認取輕敲玉韻長
金粟妝成扼臂環舞腰輕薄一作轉瑞雲閒紅兒生在開元末羞殺新豐謝
阿蠻

君看紅兒學醉妝誇裁宮襖研裙長誰能更把閒心力比竝當時武媚娘
梔子同心裊露垂折來深恐沒人知花前醉客頻相問不贈紅兒贈阿誰
雲閒翡翠一雙飛水上鴛鴦不暫離寫向人閒百般態與君題作比紅詩
舊恨長懷不語中幾回偷泣向春風還緣不及紅兒貌卻得偷生入漢宮
一舸春深指鄂君好風從度水成紋越人若見紅兒面繡被應羞徹夜薰
花落塵中玉墮泥香魂應上窈娘堤欲知此恨無窮處長倩城烏夜夜啼
虬詞藻富贍與宗人隱鄴齊名咸通乾符中時號三羅廣明亂後去隨鄜
州李孝恭籍中有杜紅兒者常爲副戎屬意副戎聘鄰道虬請紅兒歌而

贈綵孝恭以副戎所盼不令受之虬怒拂衣而起詰旦手刃紅兒既而思之作絕句百篇以追寃號比紅兒盛行于時

羅隱

字昭諫餘杭人隱池之梅根浦自號江東生爲唐相鄭畋李蔚所知畋女覽隱詩諷誦不已畋疑有慕才意隱貌寢陋女一日簾下視之自此絕不詠其詩廣明中池守竇滂營墅居之光啓中錢鏐辟爲從事節度判官副史梁祖以諫議召不行開平中魏博羅紹威推爲叔父表授給事中年八十餘終餘杭

有子
蹇翁

隱虬鄴共場屋謂之三羅

隱與桐廬章魯封齊名錢鏐初起以魯封爲表奏孔目官不就執之後以隱爲錢塘令懼而受命因宴獻口號曰一箇禰衡容不得思量黃祖謾英雄鏐自是厚禮之

僧貫休懷二子詩云二子依公子雞鳴狗盜徒青雲千里遠白髮一莖無

風瀟潮聲惡天空角韻孤別離千萬里何以慰榮枯

隱謝裴廷韓詩卷云澤國佳人唯妝半面營邱辨士何用空籠其浮薄如此隱受知于令狐綯卒無成有詩哭綯云恩深無以報底事是柴荆

鄴都羅紹威學隱爲詩自號其文爲偷江東集青州王師範遣使齎禮幣求一篇隱以詩寄之曰盛業傳家有寶刀況聞餘力更揮毫腰閒印綬黃金貴卷內文章白雪高宴罷佳賓迎鳳藻獵回諸將問龍韜登壇甲子纔三十猶擬回頭奪錦標王得詩大喜昭宗欲以甲科處之有大臣奏曰隱雖有才然多輕易明皇聖德猶橫遭乎譏謗將相臣僚豈能免乎凌轢帝問譏謗之詩對曰隱有華清詩曰樓殿層層佳氣多開元時節好笙歌也知道道德堯舜爭奈楊妃解笑何其事遂寢

令狐滈趙公綯之子也登進士隱以詩賀之趙公謂滈曰吾不喜汝及第喜汝得羅公一篇耳

隱在浙幕沈山松得新榜示隱題其末曰黃土原邊狡兔肥矢如流電馬

如飛霸陵老將無功業猶憶當時夜獵歸

鍾陵妓雲英隱舊見之一日譏隱猶未第隱嘲之曰鍾陵醉別十餘春重見雲英掌上身我未成名君未嫁可憐俱是不如人

顧雲依淮南高駢隱譏之夏飲于海風亭曰青蠅被扇扇離坐隱遽曰白澤遭釘釘在門

隱老不遇有歸五湖詩云江東日暖花又開江東行客思悠哉高陽酒徒半凋落終南山色空崔嵬聖代也知無棄物侯門未必用非才一船明月一竿竹家住五湖歸去來

進士劉贊贈隱詩曰人皆言子屈我獨謂君非明主既難謁青山何不歸年虛侵雪鬢塵枉污麻衣自古逃名者至今名豈微

牡丹云似共東君別有因絳羅高捲不勝春若教解語應傾國任是無情也動人芍藥與君爲近侍芙蓉何處避芳塵可憐韓令功成後辜負穠華過此身

籌筆驛云拋擲南陽爲主憂北征東討盡良籌時來天地皆同力運去英雄不自由千里山河輕孺子兩朝冠劍恨譙周惟餘巖下多情水猶解年年傍驛流

魏城逢故人云一年兩渡錦江遊前值東風後值秋芳草有情皆礙馬好雲無處不遮樓山將別恨和愁斷水帶離聲入夢流今日因君試回首澹煙喬木隔綿州

中秋夜不見月云陰雲薄暮上虛空此夕清光已破除只恐異時開霽後玉輪依舊養蟾蜍

蜂云不論平地與山尖無限風光盡被沾採得百花成蜜後不知辛苦爲誰甜

杜荀鶴錢塘別隱詩云故國看看遠前程寄在誰五更吹角候一葉渡江時吾道天寧喪人情日可疑西陵向西望雙淚爲君垂

鼉江常有二氣互于江上終夜不滅隱及杜建徽生氣不復見議者以爲

文武秀氣

江南李氏常遣使聘越越人問見羅給事否使人曰不識亦不聞名越人云四海聞有羅江東何拙之甚使人曰爲金榜上無名所以不知

陸扆

扆詩有今秋已約天台月之句或云扆昭宗末舉進士第六月榜出盛暑同舍戲曰造榜天也觀扆此詩豈幸倉猝苟科第者